


十一



七  
十



七十九

崇禎十六年十七年



國權

癸未崇禎十六年

正月丙申朔命各督撫圖功自贖

建 攻開州

李自成陷承天總兵錢冲選戰沒巡撫湖廣右僉都御史宋一鶴自  
經知府扶風王琰留守都司宣城沈壽崇鍾祥知縣建昌蕭漢死之  
漢字雲濤崇禎丁丑進士知鍾祥有聲賊戒其部曰殺賢令者死無  
赦乃幽之寺中戒諸僧曰令若死當屠爾寺僧謹視之漢曰吾盡吾  
道不得汝法遂自經巡按御史李振聲以李自成同邑認振聲為兄

同本廠  
荆川文錄

鹽官談遷孺木著



振聲罵曰汝乃雙泉里死賊吾乃太安里鄉紳恨不能手刃汝尚言  
降耶遂羈振聲于襄陽檀溪寺後殺于裕州南門外因忤左營監軍  
周乃深誣其降賊高立陳明盛陷賊目見振聲不屈特白其事自成  
改承天曰揚武州崇王由楫改襄陽伯邵陵王在鉞改棗陽伯保寧  
王紹妃改宣陽伯肅寧王術竣改順義伯

欽天監博士楊永裕投李自成稱天文禮樂兵法地理俱該洽請發  
顯陵修聲起山谷若雷震乃止牛金星不可嗣後勸進金星又不可  
而自成心欲之於是設六政府侍郎即中從事等官其示約批發悉  
出永裕增府同知州判官縣主簿俱質其親屬遣之以襄陽府為襄  
京脩宮殿吏政府侍郎石首喻上猷坪猷進即中江陵徐五墳從事

鍾祥顧君恩歲戶政府侍郎江陵蕭應坤萬曆丙辰進士從事江陵  
郭附龍諸禮政府侍郎招遠楊永裕兵政府即中江陵王家柱丁丑  
貴池從事江陵傅朝升諸刑政府即中江陵鄧巖忠丙子荆州防禦  
使洛陽孟長庚墳荆州府尹長葛張虞機諸揚武防禦使雒陽陳蓋  
甲戌進士安陸府尹商州姚胤錫墳襄陽防禦使郊縣李之綱諸襄  
陽府尹甯豐牛全諸南陽防禦使鍾祥吳大鴈諸南陽府尹江陵劉  
蕪墳信陽防禦使江陵黃閣墳汝寧防禦使江陵金有章墳汝寧府  
尹江陵鄧連墳均平府尹鍾祥劉懋先諸先是自成蹂躪中原陷城  
克邑多不守及渡漢江長驅入荆見無一兵遂有據志先守荆襄次  
及承天德安漸及汝南分設衛兵通達衛制將軍任光榮以兵六千



守荊州分二千守澧州通達衛左威武將軍蘭養成以步兵八百守夷陵通達衛右威武將軍牛萬才以兵六百帥標都尉張禮以水兵六百分守夷陵帥標威武將軍王文耀以兵六千守澧州揚武衛果毅將軍白旺以兵三千守安陸都尉董雲林以兵六百守荊門帥標威武將軍謝應龍以兵三千守漢川之馬家隔左衛都尉馬世泰以兵六百守顯陵襄陽衛左威武將軍高一功右威武將軍馮雄各領兵二千汝寧衛威武將軍韓美華以兵八百守信陽均平衛果毅將軍周鳳梧以兵二千守禹鄭二州原鎮守自成入楚後人心惶懼各棄城走張獻忠乘之進師攻取

丁酉吏科都給事中吳麟徵等疏救姜埰熊開元不聽

黃河口燬漕舟三千五百隻

己亥建 攻滑縣趨東昌

甲辰李乾德為右僉都御史提督軍務撫治郟陽朱一馮為右僉都御史巡撫宣府

乙巳逮前順天巡撫潘永圖山永巡撫馬成名

寇陷雲夢

丙午享太廟

寇陷孝感

丁未左春坊左庶子楊觀光翰林院脩撰劉理順各以直東宮講讀不便守門免之



李自成至黃陂官吏先遁賊設偽令士民殺之賊怒攻黃陂屠之墮其城  
山東沂州道僉事丘祖德吏部推巡撫保定巡按山東御史陳昌言  
嘗劾其禽吏部以請命改推

戊申陷景陵賊別將陷德安黃州守將王允成棄城東下掠容舟大  
擾江南北

己酉刑部尚書徐石麒罷郎中劉沂張名籙削籍以姜埰熊開元竟  
具獄不廷訊也

庚戌吏部奏甄別在籍司官從之

辛亥左良玉復監利

壬子諭都察院再責巡按痛革沿習力行察吏安民之事勿憚辛勤  
勿徇情面勿縱吏胥堂上官詳議條奏

周鼎署工部事

癸丑神廟和妃氏薨

戶科給事中袁彭年言涿州知州劉三聘奏薦逆輔馮銓請假便宜  
行事夫鄉紳城守在有之亦自為身家計事平旌勞可也何至借  
口公舉為捲土燃灰之事哉

乙卯吏部奉命甄別京堂光祿寺卿葛徵奇太常寺少卿提橋宜調  
南京太僕寺少卿李嵩宜劾南京大理寺卿李一鵬宜免應天府尹  
祁逢吉宜改大理寺丞余文燭宜閑住報可



丁巳左良王復石首

張獻忠陷蘄州夜梯城而入旦日獻忠入城令薦紳孝廉文學各冠帶自東門入西門出各斬之御史饒京等預為開各門放男子出留婦女毀城稍不力即被殺下江防道副使仁和許文岐微服出被執獻忠頗禮之挈於行宮陰謀圖賊四月十八日殺於麻城文岐崇禎甲戌進士授南京兵部主事歷職方郎中出知黃州獻忠入寇檄諭威德獻忠語檄者曰爾郡王非杭州脩文坊許氏子子對曰然獻忠曰吾少時販紅花寓杭州脩文坊茲眾識是子吾且去以為若德遂割持檄者之耳引眾去唐辰冬轉令官

初荆王由孖性狂蕩嘗市為募團人得霍承忠問其所生歲月日時

皆與王同大異之曰爾即我也命侑酒自是非承忠不快也授校尉納級指揮捐金為治宅時過飲甚歡郎中事皆預焉因通次妃桂氏諸宗室訴于副使許文岐捕之匿於王宮而事益急遂走入張獻忠所為軍鋒而王前薨矣妃蕭氏同世子先一日出奔承忠馳入王府挈桂妃去

戊午止巡撫甘肅右副都御史林日瑞入援

禮科都給事中沈胤培請補河南鄉試從之

夜嘉興見日如西出二三大而沒

己未左良王復公安

辛酉左良王復隨州



是月滄州浚濠得石碑鐫一陰道人歌曰無足者烏無角者牛並出  
北海實彼醜謀天心厭亂必斯之隅山東之竇死不可留

二月乙丑朔日食

滄州掘火藥數萬斤及西洋砲四十俱刻兵部尚書劉伯溫造

丁卯建 掠壽光

戊辰 上祭太社太稷先一日清霽至期大風雨土五色炬滅諸闈  
幕黃布磅紙障之拜訖而退還宮仍清霽御史曹溶導駕明日欲奏  
災異閣臣阻之是日春分祭朝日壇卯刻遣定國公徐允禎而禮科  
都給事中沈胤培給事中荆祚永等出朝陽門至則禮畢胤培上言  
如同日兩祭請聖裁或日不可改而時則可移昭示臣等各知遵守

從之

建 攻德州陷武定

庚午李自成遣賊陷麻城分其兵為四馬守應守承天羅汝才守襄  
陽賀一龍往黃州自將其一

壬申命追劾戶部尚書傅淑訓兵部尚書陳新甲以該科不先劾也  
戶科右給事中熊汝霖論福建按察司始磨汝霖前劾巡撫九人語  
侵周延儒

建 攻樂陵

癸酉兵部添設左侍郎張鳳翔罷

甲戌命給事中左茂第郭充第催漕南直浙江江西湖廣



都察院左副都御史張瑋舉一極廉曰原任南京御史成勇糾一極  
貪曰巡按御史王志舉章下所司

建 陷萊陽殺故工部右侍郎宋汝吏部 郎中宋應亨中書舍

人趙士驥 知縣張宏德等萊陽知縣真定陳顯際自經顯際字

道隆崇禎庚辰進士宋汝字文玉天啟乙丑進士知杞縣擢吏科給

事中歷令官先是敵來攻合禦卻之而宋氏世開素橫於里方置酒

高會或購敵一夕陷之

乙亥御史趙翼劾兵部尚書張國維不問

戎寅張忻朱世序為刑部左右侍郎高倬為南京右僉都御史提督

操江秦所式為右僉都御史巡撫河南徐標為右僉都御史巡撫保

定提督紫荆蕪海防軍務

都察院左副都御史張瑋致仕

庚辰平賊將軍左良玉避賊東下沿江縱掠土寇叛兵俱冒左兵攻

剽南都大震留守遣兵擊之斬千人稍戢泊安慶安慶兵備道僉事

張亮登其舟留之協勅不聽

辛巳止總督漕運史可法入援

大學士周延儒自陳宿直廬壬辰命入直

壬午山東總兵官劉澤清敗建 於安丘

左良玉泊池州清溪口副總兵王允成稱以二千人勤王縱掠青陽

南陵繁昌沿江騷甚薄於蕪湖兢傳其兵叛南京兵部尚書熊明遇



遣提督孫尚進總兵杜弘域等各引兵至蕪湖東梁山以觀變明遇  
知良玉為尚書侯恂舊部恂次子方域適在金陵代為尚書書曰頃  
待罪師中每接音徽嘉壯志又未嘗不歎以將軍之才武所向無前  
而犄角無人卒致一箚遺憾今先燭復張墮壞名城不下十數飛揚  
跋扈益非昔比雖然天厚其毒於斯極矣非常之功必待非常之人  
一時聞外士銳馬騰有如將軍者乎忠義威略有如將軍者乎父於  
行陣熟悉情狀有如將軍者乎然則今日所稱為熊羆不二心者舍  
將軍其誰老夫曩者倉卒拜命固以主憂臣辱金革之誼不敢控辭  
亦緣與將軍知契素深相須如左右手倘得憑先聲殲渠俘馘賢干  
載一時不謂六年患難病疾已篤更遭家變痛毀之過遂致痿廢爰

以採薪之憂未畢盡瘁顧念高厚末由報塞惟願將軍曹其餘勇滅  
此朝食是則十五年舊部所以不忘老夫而老夫藉手以荅萬一猶  
之其身爾矣勉旃勉旃鄉土喪亂已無寧宇闔門百口將寄白下喘  
息未蘓風鶴頻警謂將軍駐節江州且揚帆而前老夫以為必不然  
即陪京卿大夫亦共信之而無知市井倉皇訛以滋訛幾於三人成  
虎夫江州三楚要害麾下汛防之衝也郢襄不戒賊勢鴟張時有未  
利或需左次以驕之儲感宿飽殫圖收復在將軍必有確畫過此一  
步便非分壤冒嫌涉疑義何居焉若云部曲就糧非出本願則尤不  
可朝廷所以重將軍者以謂節制經緯危不異於安也荆土千里自  
可共食豈謂小饑動至同諸軍士倉卒耶甚則無識之人料麾下自



率前驅伴送室帑匈奴未滅何以家為生平審處豈後驃姚或者以  
垂白在堂此自綱紀奉移內郡何必雙旌聿來相宅况陪京高皇  
帝考劔所藏禁地肅清將軍疆場師武未取進止詎宜展覲語云涿  
言止於智者若將軍今日之事其為涿言又不待智者而決之矣惟  
是老夫與將軍義則故人情實一家每聞將軍奏凱獻捷報効朝廷  
則喜動顏色傾耳而聽引席而前惟恐其言之盡也或功高而不見  
諒道路之口發為無稽則輒掩耳而走避席而去感乎其不願聞也  
頃者浪語最堪駭異雖知其妄必以相告將軍十年建樹中外倚賴  
所當矜重以副人望郭汾陽功蓋天下勢極一時而國體所關呼之  
未嘗不來遣之未嘗不去當其去來若不自知其大將也同時臨淮

亦與齊名其後勢位之際稍不能忘偃蹇蹉跎乃至偏校不復稟承  
此無他功名愈盛責備益深善處形迹昭白宜早惟三思不盡良玉  
得書稟答卑謹一如平昔

楊廷樞曰寧南感恩原不欲負朝廷者駕馭失宜以致不終深可  
歎也

癸未粥近畿難民

李自成攻郊縣知縣李貞率士民堅守一晝夜殺傷甚衆賊百道攻  
陷縱兵大殺李貞叱賊曰驅百姓死守者我耳安殺何為罵賊不已  
賊磔之母喬氏及妻俱死之

丁亥張宸極為戶部左侍郎胡世賞改右侍郎



張獻忠陷漢陽

戊子京師大風霾夜震西長安街石坊天津城門自開

加王繼謨兵部右侍郎

總督漕運朱大典免南京左軍都督府忻城伯趙之龍劾其貪婪命撫按覈實

兵部右侍郎葉廷桂罷

己丑許巡按河南御史蘓京募標兵四千人

庚寅左良玉還池州在池隄四旬雞犬一空經掠銅陵遺南京諸臣

書云暫駐池州伏候鈞示

兵部職方郎中尹民興等請復劉宗周金光宸官不聽

壬辰起惠世揚都察院左副都御史

呂大器仍以兵部添設右侍郎兼右僉都御史總督保良山東河北

軍務

建出登萊合軍

談遷曰戊己間東師再入浴鉄之騎躡趙蹂齊馳突二千里烟燧

望於淮海當其時建牙如山分戍如林咸縮胸逆避無櫻其鋒者

以遇難諸臣雖身膏草野予敵頭顱非常山睢陽之節也蓋腥風逆

兢魚潰獸挺未銳已盡寧埃甲乙間見之哉

命徧沅巡撫移荊州撫治鄖陽控扼襄鄖巡撫湖廣則往來承天德

安蘄黃間



是月趙王常清薨年二十七謚穆王其伯成鼻王翊攝國事

虎入武昌正陽門民家獲之

巡撫河南右僉都御史王漢招諭永城叛兵入城中砲死漢字子房掖縣人崇禎丁丑進士知河內壬午六月擢御史奉命督理援兵未浹月巡按河南尋補巡撫變聞贈兵部尚書廕錦衣衛百戶談遷曰王漢在臺不半載躡開府趨進之速前此未有也身隕永城出於不意雖未為失策於成事何居焉而降爵世廕卹典之渥設殄大寇奏奇捷又何以加之當事不揆本末幽光過溢此曹子爵以少牢亦足以死矣

三月甲午朔暹羅入貢

乙未土寇陷澧州土寇勾李自成陷常德常德富甲湖南粟支十年巡撫陳睿謨遇賊于郊先奔民無固志遂陷之自是辰岳相繼俱陷雲貴路梗矣

建 陷順德殺知府吉孔嘉同知

通判

推官

昭磨張國卿

吏部言入覲官道梗俟四月朔大計從之

丁酉禮部儀制主事吳昌時改吏部文選主事署郎中事以吏部尚書鄭三俊薦也昌時好結聲氣通司禮太監王化民等覬銓司三俊嘗以問鄉人徐石麒荅曰真君子三俊特薦蓋石麒畏昌時機深非忠告也



張猷忠陷斬水屠之奸宦周之仕購之也知縣嘉興胡振芳遁  
建 攻德州不克往西北別部攻武定州拒卻之俄守備放砲誤傷  
臂守者潰城遂陷  
召左諭德方拱乾河南道御史祁彪佳刑部右侍郎朱世守及會稽  
人凌超於中左門超自謂知兵覬大用既召對命往通督行營贊畫  
大失望又奏兵事不聽

庚子建 攻樂陵

辛丑毛士龍為左僉都御史郭都賢為右僉都御史巡撫江西

李自成殺其黨羅汝才智一龍兩部兵馬最雄自成忌之偽宴兩人  
汝才疑不至即席斬一龍凌晨二十騎突入汝才營斬之汝才延安

入同李自成劉國龍投高氏營高氏敗自成為雄自成兵善攻汝才  
兵善戰而汝才淫侈女樂數部自成忌汝才并斬其主謀貢士尤玄  
珪分其兵各將中軍楊山旗鼓朱養民將官楊承恩李汝桂王可懷  
郝有法又其叔羅戴恩俱從自成思報後三日楊承恩以數十人走  
陝西李汝桂走安廬先是自成授馬守應永輔營英武將軍在澧州  
聞汝才一龍死懼甚屢徵不至

李自成偽稱倡義文武大元帥一品次權將軍品二次制將軍品三次果  
毅將軍品四次威武將軍品五次都尉品六次掌旅品七次部總品八次哨總品九  
時提營總督權將軍田見秀帥標權將軍劉宗敏宗敏狡悍善戰賊  
時之帥標制將軍賀錦帥標正威武將軍張萬自成義子也帥標副



威武將軍虎守素帥標左威武將軍辛思忠標左果毅將軍谷大成  
首隊標右威武將軍李友次隊標前果毅將軍任繼榮標後果毅將  
軍吳汝義左營制將軍劉芳亮左營副制將軍劉希先左營果毅將  
軍馬世雄左營威武將軍劉汝魁右營果毅將軍白鳩鶴右營右果  
毅將軍劉體純前營果毅將軍田虎後營制將軍李過過左目眇少  
年醜戰後營左果毅將軍張能、性狡喜殺後營右果毅將軍馬重  
儔帥標旗鼓楊彥和加威武將軍帥標旂鼓趙應元朱養民范鼎華  
共兵二百三十餘隊標營隊百右左前後營隊百三十每隊騎五十  
廝養小兒三十或四十步兵每隊一百或百五十總步騎六萬馬羸  
二萬隊各建一標營將各一纛標營白幟帶以雜色纛皆黑左營幟

皆白右皆緋前皆赤後皆黑纛各隨其色自成獨白鬃大纛銀浮屠  
不用雉羽臨戰輒領標而前

壬寅南京戶部尚書張慎言兼南京右都御史

建 掠慶雲

癸卯禮部尚書東閣大學士吳姓兼兵部尚書督師平寇賜尚方劔  
給五萬金旌功

故 馬明卿贈太僕寺少卿

甲辰命紫荊閣及宣大山西治兵控 毋縱突取咎

乙巳孟兆祥為通政司使王楊基為右僉都御史巡撫承天德安

建 陷南宮



青巡撫登萊右僉都御史曾櫻縱敵

丙午總督鳳陽馬士英移兵攻永城劉超

丁未督師大學士吳姓言今日集兵措餉必先鞏固江南乃可恢復

江北則武昌九江其要衝矣賊精兵不下二三十萬我兵非十萬不

能爭鋒孫傳庭敗餘收拾殘卒無幾須俟退後邊鎮援兵調赴秦

中聽傳庭選調剿寇兵力為少厚臣軍道金陵急趨九江武昌相機

進止且可調集兵餉接濟江北黔督提師移駐并秦蜀晉豫應

皖江淮各撫鎮兵扼險上是之遂議設標兵二萬

盜陷武岡州殺岷王企鰲時常德武陵衡桂蠻獠皆伺隙土寇勾引

攻掠

戊申國子生徐爾斗上故大學士徐光啟農書命梓行

唐成路振飛為光祿寺少卿范廷輔改太僕寺少卿

建取道彰德順德北向命嚴真定保定守備

前都察院左副都御史張瑋卒瑋武進人弘光初贈吏部右侍郎謚清惠

乙卯鑄督師輔臣之印

故張德昌贈左都督

丙辰連入覲官大計

免直隸山東殘破州縣去年田租

張獻忠復陷黃州及黃陂奸紳歐陽玖迎降執副使樊維城欲降之

不屈賊刺之洞胸死獻忠自稱西王麻城諸生周文江迎降授知州



尋陷羅田

丁巳起高弘圖南京兵部右侍郎胡應台改南京戶部尚書  
王聚奎為右僉都御史巡撫湖廣吳麟瑞為右僉都御史提督偏沅  
巡撫湖南北

戊午例轉給事中范士髦等四人御史陳蓋等六人故事例轉科一  
道二文選主事吳昌時特廣其數意嚇臺省為異日驅除地也

總督鳳陽馬士英前調貴州兵五百至祁門婺源掠婺源人饗於  
汪氏一夕燬之士英參徽州知府唐良懿推官吳翔鳳等祁門知縣  
朱世平鄉官山東僉事金聲命逮翔鳳世平聲聲至淮安蒙起用會  
母卒憂去

辛酉郝晉為順天府尹

壬戌刑部擬戍姜採不許

癸亥建至易州之楊村命各督撫會剿

是月兵部右侍郎倪元璐召對申奏曰為今本謀存乎主術力行仁  
義提振紀綱愛惜人才崇尚氣節定心志一議論信昭令慎刑賞其  
下則竭忠畢力惟敵是求如此何患大功不成太平無日乎臣沿途  
凡遇兵將輒稱敵實難殺而遇難民皆云敵實可圖蓋兵將見形難  
民見情凡稱鉄騎精兵綿亘數十里衝突飄忽所向無前者形也兵  
將見而震之真敵無幾遼人過多又敵歸營散渙踈略夜即淫酣款  
弓熟寐又中怯畏死稍失利即合營痛哭又遼人每凌西虜心志不



威者此其情也難民入敵中而知之夫攻形用力攻情用謀今行間諸臣烏有能用謀一為掩伏偵間之事者乎寡不可禦衆弱不可禦強雖零捷時有而大獲無聞防守有餘而勦擊不足非不用力勢使然也至於我兵情形惟見卑弱臣至淮上比天下重鎮乃撫院標兵不滿二千每日兵餉不過五分撫臣史可法最稱忠勇當敵攻淮北亦僅盡河而守過敵南渡已耳濟南德州土兵皆不滿千山東標兵亦僅三千其餉皆同淮上所見應天浙江江西援兵皆無馬甲餉有不足四分者總兵唐通今之名將統兵不滿三千曾對臣言亦不任殺敵嗟乎竭天下之財以養兵而兵饑如此疑子兵多故餉薄而兵少又如此臣誠不知其故也今敵分東西二路東路謀至青縣大城

西路謀從定州移方順橋稍西臣度其必俟兩幟相望西路從保定突衝良涿轉掠過東合營出口宜及敵未合盡集各路兵并攻東路勿擊首尾避其鋒悍制奇設伏直搗中堅凡敵輜重難民率居中堅猝擊衝之難民必亂勢成破竹東路既潰則西路自不敢東勢不得不趨固龍二關星於險阻於是合山西宣大保定三路重兵遮追夾擊亦可得志如此庶成大創去不復來今敵分兵亦與俱分恐敵合兵不得復合敵勢并力奮死即遂翻然枕席上過孰復有誰何者乎臣度連人報功以奪回難民牲口張皇露布此於九牛之一毛何損急須傳飭今禦寇機宜在乎足財制民以臣愚見督撫行軍必假利柄一切屯鑄醵權之務悉聽便宜所稱滿用滿錢勝氣自出昔宋邊



將家屬皆食於縣官市租權稅悉捐予之凡將皆有黃金享士牛酒  
犒師終宋之世名將如雲職此之故馭將之法必使難貴易富貴極  
必驕富極必勇伏候 聖裁

翰林院簡討汪偉上言創大業者必先立根本而後可以言進取定  
大亂者必先固根本而後可以言蕩除臣世籍金陵歷年已久今日  
急務敢為略陳一曰布置之法留都城周百二十里竟一日之足不  
能徧集十萬之衆不能周是以策留都者謂無守城之法止有守江  
之法賊自北而來則淮為之防賊自上而下則九江為之防故禦淮  
即所以禦江而守九江即所以守金陵也蓋九江當江漢之衝倘荆  
襄之賊因工洑之勢乘風水之便突如破竹無所碍阻往代之事如

王濬之樓船韓擒虎之飛渡伯顏之不戰而入皆可為寒心也考之  
地形武昌譬之大門也九江譬之階除太平譬之堂奧也宜設重臣  
駐節武昌上為圖荆襄脩復顯陵之本下為扼蘄黃接九江鞏壯孝  
陵之勢至於九江宜建督撫如淮上之制太平采石宜命南京侍郎  
建牙於此作聲援而鞏壘壘若文武操臣宜駐師新江口以專隄防  
備策應也江北浦口江南頗狹一葦可航宜以侍郎一人守之仍命  
巡江御史防江防之所不及輯陸路之暗通者此上江之布置也  
若城中之守惟在聯合人心保無內潰大司馬名為贊畫與百姓尊  
而不親府尹府丞所宜重其權久其任以聯百萬士民之心內增無  
形之金湯而外佐司馬操江之責任者此也尤可異者南中兵部與



操江事不相涉操江欲用兵而無人兵部宿重兵而無用豈成一體  
並濟之誼臣以為操臣與兵部軍中之事宜呼吸相應無以城之內  
江之上功罪不相及遂置不關也此城內之布置也一曰用人之法  
留都最重清議清議所歸雖處下僚處草<sup>野</sup>而名家巨室想望丰采為  
之奔走而不可得今操督之臣及京兆非久任地方威望素著人心  
向往且夕受事者未可勝此而愉快至於兵則大小水陸四營神機  
巡遊二營未嘗乏人督輔得人則群才輻輳况有廢棄之將可按籍  
而起山林之材可側席而訪乎此用人之法也錢糧正解尚且虧額  
况欲加設撫將計將安出臣按南京營兵舊稱十萬有餘今大教場  
存者只六千三百小教場存兵九千一百新江口五千八百總不過

三萬而徒手寄操者居十之三老稚疲癯者居十之七所恃者山水  
陸標三營有四千八百有奇而近亦非其舊乃兵虧而餉不減宜舊  
額補足或於各衛之官舍餘丁操其精壯補成全伍此輩以土著之  
人舊有舊額之糧略加鼓舞壁壘一新江上督撫分而領之自可得  
防守之助矣江守以船為急察新江口船舊額四百有奇今存百十  
隻耳水營兵船原數滿百今蓋寥、察得船隻皆有舊額錢糧一一  
清出補足原數而新設之汛地尤宜多造船隻以備中涿之擊或用  
有不足暫借蓋課若干或食有不足暫截漕艘若干此亦設處之一  
法使而易行之事也防守既備務使扁舟不得渡江孝陵即可安堵  
是守武昌守九江即所以守孝陵也孝陵既安然後顯陵可規進取



况三吳兩淮兩浙錢糧數百萬都門待以為命者地形又在金陵之  
下一水可通所繫何如其重而皆視武昌上流以為安危則其圖之  
可不早而言之可不詳耶

四月甲子朔吏部始大計

建北折道畿內經寶坻

乙丑河南道御史祁彪佳劾吏部文選郎中吳昌時紊制弄權山東  
道御史徐殿臣賀登選各跡劾之

改禮闈八月

丁卯兵部右侍郎倪元璐直講官

戊辰大學士周延儒自請督師禦胡襄城伯李國禎請選官舍銳士

從征報可  
釋輕繫

辛未寇從監利窺岳州分趨城陵磯荆河口車灣巡按御史劉熙祚  
調兵禦郤之華容安鄉石首公安監利等縣寇俱退

壬申樂安長公主薨

癸酉定王冠

命御馬監太監李國輔諭援剿總兵左良玉良玉辨副總兵王允成  
非叛也營兵不戒臣不許竟指為允成非也

令襄城伯李國禎選練官舍歸併京營

巡撫遼東黎玉田進三品服俸



乙亥袁繼成為兵部右侍郎兼右僉都御史總督江廣應皖軍餉扼  
九江

丙子暫停河工

聞建至珠瑤河命各督撫扼剿毋逸

庚辰朝廷誤聞左良玉誅王允成特賜金幣允成故在

辛巳官兵戰於螺山八鎮皆逃惟步營兩監軍御史在御史蔣拱宸

飾功報捷

壬午復朱國弼撫寧侯

徵南京誠意伯劉孔昭忻城伯趙之龍

癸未趣大學士王應熊入朝

宣督師大學士周延儒於武英殿

甲申諭士民擒斬偽官者秩之收捕賊徒者賞能俘獻即超擢

總督宣大孫晉請東行逐胡命聽元輔節制

丙戌周延儒報斬級百餘時邊墻毀拆所掠子女金帛捆載出入如  
織卒無一矢加遺也

張獻忠陷麻城署縣教諭蕭頌聖自殺

張獻忠自鴨蛋洲渡江擣武昌前大學士賀逢聖同守臣力拒

是月鄢陵隕霜殺麥饑民食蓬實

五月癸巳朔總兵方國安率兵七千扼蘄州張獻忠西向武昌武昌備  
禦積弛議募兵守城而乏餉楚王有積金百萬有司請貸金以贍軍



王不應大學士賀逢聖家居倡義捐貲僉謂宜募土著適承天潰兵  
下焚王募之為軍鋒以長史徐學顏領之弼楚府兵  
張獻忠悉師破漢陽臨江欲渡武昌大震議撤江上兵嬰城守恭將  
崔文榮曰守城不如守江守江不如守漢磨盤煤炭諸洲淺不過馬  
腹縱之飛渡而嬰城坐困非策也守臣不從賊果從煤炭洲潛渡逼  
城文榮禦之小利賊攻武勝門文榮力拒多殺傷

甲午召周延儒入朝

降將惠登相王先恩在鄖陽陰使人招羅汝才所部多奔降李自成  
怒攻鄖陽屢敗之自成遂築長圍以困鄖

丙申令延綏甘肅寧夏各兵即遣監軍述馳河南聽豫撫調發時巡

撫河南右僉都御史秦所式上言中州大勢李羅蹂躪五郡八十餘  
城夷為瓦礫及賀左諸寇由宛汝跨江漢旬日陷數名郡不啻摧枯  
拉朽此涿寇之大略也自永城以至閩鄉靈寶自宛汝抵河岸方千  
里之內皆土賊栖山結寨日事焚掠如武三翟崇孫學禮周加禮周  
道玄徐良臣金高等各千百其衆李際遇申請邦李好等各萬人馬  
皆干計又劉鉉李奎鄭乾劉洪禮等似賊似民各衆數千又土寇之  
小袁營馬步三萬盤据太康杞柘城獲鹿之間借討逆之名肆窺渡  
之實此土賊之大略也辦賊必須兵舊撫餘兵不及二千陳永福殘  
卒未及四千合小從善三千餘人亦不滿萬伍而不械、而不甲束  
辦逆起北防河患河上止臣一旅此主兵之大略也用兵必裕餉河



南五郡淪沒河北強半蒿萊區、五十餘萬之名即全徵不足供主  
客之半昨年完不二十萬撫鎮闕餉五月卜從善兵食易州之餉闕  
五月此糧餉之大略也轉餉必須民河南經寇十餘年河北寒、人  
烟幾斷守城脩河開墾轉運至于稚子荷旗老姬鳴柝靡晝靡夜墊  
隘呻吟此民生之大略也撫民必須官按便覽則有官稽地方則無  
官或一年半載不赴任或隱栖河北首鼠不前或教官署事或佐貳  
無攝或山寨墊身或土團寄命此官吏之大略也嗟乎敗壞已極惟  
願皇上速發內帑見徵河北亟練精銳佐以土寨開荒選牧庶有  
豸子

丁酉寇陷保康知縣石惟壇死之

乞亥召巡撫保定右僉都御史徐標入對標曰臣自江淮來數千里  
見城陷處固蕩然一空即有完城亦僅餘四壁城隍物力已盡蹂躪  
無餘蓬蒿滿路雞犬無音曾未遇一耕者成何世界 皇上無幾人  
民無幾土地如何致治乎 上欬欬泣下標又曰須嚴邊防天下以  
邊疆為門戶門戶固則堂奧安宜先時脩備與其重治於失事之後  
而無益不如嚴整於無事之日而有備也又曰脩內治全在守令守  
令賢則政自簡刑自清盜自息民自安矣 上曰諸臣不實心任事  
以至此皆朕之罪標又言車戰墾田臣所謂墾者與屯田不同止就  
納糧之田招民開種民賦漸復額國課自完 上善之標四月己卯  
受事辛卯陛見賜金幣至是復召蓋 上閱畿民欲得其詳也



庚子馳賜周延儒金幣  
辛丑周延儒報臣冒警中夜自順義抵密雲趣各督撫逐胡令出俱  
塞上溫音勞之

談遷曰建雖積悔我吏卒然深入日久矣竭弓脫資裝甚重士  
馬俱備各張凜不自全使燕齊之間少有闕將獨當一陣襲其後  
彼為遁計能自完乎宜與巧人也自請逐胡謂乘其敵而圖之似  
易宜亟馳塞下設伏險隘分兵邀截伺便掩擊庶不負請纓之志  
顧尾而縱之克還無害則何煩丞相之驅馳也相傳入建重賂  
或祖洪基在敵故通款得假其道耶

李自成遣兵十萬至禹州守將楊芬張朗迎賊賊設偽官之任

黃蜚為署都督僉事總兵官鎮守湖廣

周應期為右副都御史總理京東山永天津宣大屯務駐何家園馮  
師孔為右僉都御史巡撫陝西

癸卯戶部尚書傅淑訓除名兵部尚書張國維罷

兵部右侍郎倪元璐為戶部尚書兼翰林院學士兵部左侍郎馮元  
颺為兵部尚書不得例辭時大學士陳演謀首揆說上曰天下不  
治由兵農不合今廷臣中倪元璐馮元颺可治以元璐主賦元颺主  
兵彼此參合不日可治上心然之故有是命

李自成在襄陽所造宮殿皆傾遂移屯鄧州益兵攻鄖陽王光恩禦  
之賊屢敗孫傳庭復遣高傑來援又敗之賊退屯襄陽拘鉄工造鉄



鈎釘謀向潼關踰山險  
永城叛兵出降馬士英合軍圍誅之俘劉超入京  
甲辰諭區別行間功罪范志完兵無紀律解任聽議趙光忤借脩城  
糜費革職俟勘呂大器孫晉王鰲永金之後趙維岳李希沆各議叙  
王永吉失事但兵止二千仍聽撫王繼謨先功後罪史可法馮元勳  
亦失事聽察或曰王永吉陷七十餘城兵少見原何以慰前李懋芳  
於死也

諭兵部如各總兵入援至近郊許陞見

吏部 侍郎王錫衮憂去

乙巳周延儒入直

丙午太子少保吏部尚書鄭三俊以薦吳昌時劾罷

丁未宴入援總兵吳三桂劉澤清馬科等於武英殿

進周延儒太師中極殿大學士詹中書舍人陳演太子太保戶部尚

書武英殿大學士蔣德璟黃景昉吳姓並太子少保戶部尚書文淵

閣大學士姓兼兵部尚書各詹子入國子監賜金幣以延儒視師倍

之

翰林院脩撰魏藻德為禮部右侍郎兼東閣大學士

夜月食

戎申罷吳姓督師以遭延未行也所議用兵將仍赴秦督節制

巡撫應天鄭瑄奏左良玉駐池州索餉命還湖廣



已酉罷薊州密雲分鎮以順天巡撫三屯營總兵兼之召督師呂大器總督保定趙維岳還京通州止巡道不設巡撫昌平止鎮撫不設總督仍戒通州昌平兵毋輕調

南京吏部尚書李遇知為吏部尚書

辛亥內官監太監王之俊提督京城巡捕練兵

壬子前太子少保吏部尚書鄭三俊引咎許致仕

兵科給事中陳泰來劾周延儒冷口假道縱敵出塞上以訛傳問

總督薊鎮趙光祚總兵薛敏忠遣戍督師范志完擬徒巡撫山東王

永吉降為事官總督薊遼保定軍務練兵勦敵自効總兵劉澤清降

為事官仍鎮守山東

癸丑諭廷臣舉督撫總兵之選

丘祖德仍右僉都御史巡撫山東督理營田

福世子由崧嗣福王

諭府部大臣科道等曰首輔周延儒朕所敬禮不謂蒙蔽推諉朕不

忍爾等從公實奏

甲寅魏藻德辭禮部右侍郎許之以翰林院侍讀學士直閣藻德不

辭閣銜而辭部銜巧矣

乙卯張維機為詹事署翰林院事

吏部奏貪吏命貪甚下法司次下臺訊

丙辰兵部右侍郎呂本器仍兼右僉都御史總督江楚應皖援勦事



務兼理糧餉總兵李輔明馬科各以四千人聽節制袁繼咸仍屯撫  
孫傳庭仍總督陝西河南四川等處剿寇  
前浙江左布政使姚永濟戍邊

科給事中王都叅周延儒狡詐欺君喪師辱國

李自成殺其黨袁時中時中滑人僑開州庚辰乘饑襲開州北走尋  
擁衆四千人圍蘭陽漸數萬人弭曹賊

丁巳勒周延儒致仕有旨佐理多年朕不能盡其謀猷體量志向皆  
朕之過仍賜贖馳驛延儒奏薦蔣德璟吳姓

都督同知唐通改鎮薊州

戊午魏藻德進少詹事兼東閣大學士

命薊鎮總督練兵三萬保定巡撫兵三萬分五千五百防拱極城增

良鄉涿州兵七千

大學士吳姓致仕

歲首生部試改六月望廷試七月望

己未奉先殿雷震左鴟吻沃火并挿劍墜地鑠及銅檻劍亦鎔液火

星入殿統三匝時道士齋醮怖厓几下

庚申命閱京營勅甲車矛於觀德殿上力能挽強凡弓刃俱取勁

重不便施用

壬戌楚府募兵為賊應開門迎賊崔文榮持矛殺賊三人賊羣刺之  
洞腋死長史徐學顏格鬪賊支解之殺巡江都司朱士鼎賊取宮中



積金百餘萬楚人以其憾王之愚也沉楚王華奎于江慘民數萬餘  
縱之出城以鉄騎蹙之江中浮屍蔽江魚不可食前大學士賀逢聖  
衣冠北向拜被執賊素敬之曰賀佛遣之去逢聖以巨艘載其家出  
墩子湖自中丞鑿舟溺者十二人逢聖屍沉百七十日不壞十一月  
壬子始出屍逢聖字克繇江夏人穎銳夙成萬曆癸卯鄉舉署應城  
教諭丙辰進士及第授翰林編脩歷左中允國子司業丁卯逆瑞矯  
旨削籍上即位復官戊辰轉南京國子祭酒尋進詹事憂去哀毀  
廬墓辛未六月起詹事未至拜禮部右侍郎癸酉吏部左侍郎己亥  
進禮部尚書丙子六月兼東閣大學士歷太子太保文淵閣大學士  
逢聖學問淵邃持心終始不渝丙丁之際胡騎日警上雖鑒其精

誠仍迂視之與首輔張至發議論多忤戊寅致仕上又思之次年  
存問辛巳二月再召入朝未數月移疾去殉難後命優卹甲申六月  
贈太師謚文忠

談遷曰省會之區莫饒於楚南風不競逆腥見汚監司而下無一  
禦侮之才致命之節則未深無足論也江夏醇行淵邃身徇林下  
不忝大臣其氣節出孫承宗呂維祺上意武昌以盡食陷向者轉  
粟天下號為天府而素不積貯俄頃失守尹鐸所以貴保障也  
張獻忠據楚府偽設五府六部鑄西王之寶稱武昌曰京城大殺掠  
沿江浮屍千里蒲圻嘉魚皆降李自成聞之遺書欲獻忠歸附獻忠  
亦卑詞報之



是月戶科都給事中吳甘來上言臣從南方來扼腕楚事而於借題  
護藩者不能無說處此夫荆襄數郡固東南要害也相繼潰陷非戰  
不利也非守而糧盡矢竭也非有詭詞暗乘奸人內應出我不意攻  
我無備也撫道諸臣率護藩以去而名城一空遂使賊坐而有之嗟  
乎藩誰之藩也天子衆建親、將使藩屏帝室卒有緩急捐私倡義  
為朝廷城社人民守亦藩王職也風鶴繞傳遂匿身逃竄先去以為  
民望空城以待賊來猶哢、擁衛自功則幾不必濠之深而堞之高  
也不必人貌貅而陣風雲也不必三年九年除戎器戒不虞也脩練  
儲備明旨謂何今天潢繡錯所在要區若皆預擬遷移一局為將來  
蒙飾也將誰城為可留可去之人即名都亦可守可去之土無端播

遷及資奸人得意矣夫使守臣而誠護藩也平居則啟掖德意調攝  
軍民俾無歛怨地方有急則涕泣以告此 皇上守土不可失也其  
出祿賜之餘勵將士向來捐冢為國者 皇上未嘗不鑒之憐之破  
格褒嘉王寧不降心相從者若使輒奉以去進無以對朝廷退復不  
保冢室真藩國罪人矣藩亦奚賴此臣也且功在護藩則 皇上之  
城社人民將誰與守臣每痛心中外多故仰屋焦勞餉且日增而兵  
日增兵日練而賊轉橫總由欺弊相沿躲閃甚巧務為恢張之聲寃  
無尺寸之績有一題焉可借以掩罪為功則相率效之而事功愈不  
可問今行間借題非止一端乃借之美大其名顛倒功罪為將來害  
方大者則無逾於此夫是非不分則功罪不著賞罰可俾驅胡盪寇



將復何時故因王永祚等而申言之

談遷曰諸王雖貴重下天子一等而宗網日嚴兢奉約束示優吏民之上尺寸毋敢軼日者唐藩固驕蹇取戾然提兵千人勤王遂奪其社及巨寇鴟張疆圉波駭使王有朱虛侯之壯志北地王之義烈洒淚告吏民捐金饗士擱然擐甲登陴城存與存城亡與亡誓不輕棄此土義風一倡士氣百倍而今諸王俱生長尊富不習戶外事唐楚甘於刀俎襄荆務於兔脫甘匹夫之奔走失千乘之扞圍惟周王嘗捐餉十萬又不幸魚鼈其宮語云挈瓶之智不失守器諸王智不如挈瓶相隨以敗惜哉

六月癸亥朔劉超劉越獻俘伏誅

談遷曰劉超非叛者所收降盜為廝養卒其弟越又亡賴披猖不戒一旦失圖受其劫脅俛首乞命冀以自白故力全丁啓睿練國事等斗大一城自錮於穿雖曰愚甚亦可為招納亡命之鑒也

戊辰召隆平侯張拱薇尚書吏部李遇知兵部馮元飈御史楊鶴及桐城諸生蔣臣於中左門臣前保舉戶部尚書倪元璐薦為戶部司務其言鈔法曰經費之條銀錢鈔三分用之納銀膏鈔者以九錢七分為一金民間不用以違法論不出五年天下之金錢盡歸內帑矣吏科給事中馬嘉植疏爭之

崇德于寶村王氏田疇畝許有聲

庚午進孫傳庭督師總制應天鳳陽安慶河南湖廣四川貴州剿寇



軍務仍總督陝西三邊兵部尚書兼左副都御史鑄督師七省之印  
李乾德仍右僉都御史提督編沅軍務巡撫湖廣

序未故 由臧贈光祿寺卿廕子入國子監

錦衣衛駱養性進左都督

壬申錦衣衛孫光先進少傅

乙亥詔曰朕以眇躬祗膺天命嗣守鴻業十六載於茲宵旰圖迴惟  
弗克肩荷是懼乃自逆胡匪茹闖入內地畿內山左極目丘墟驅剿  
雖已遠奔荼毒實為可閔至深賊原我赤子亦復矯命衝行連陷藩  
封震驚陵寢豫楚江北半被摧殘重以天災沴告蝗旱頻仍奸吏貪  
官專工掊克橫征暴賦不顧凋疲致禍結兵連邊腹交困老羸轉於

溝壑丁壯耗於干戈萬姓何辜遭此異慘皆朕不德所致也拊躬內  
省憂悼良深是用深自創艾嘉興海內更始特下罪己之詔弘敷發  
政之仁念加派賦重久應蠲除時屬用兵勢非得已除河南五年被  
陷已捐免外今將省直殘破府衛州縣自十六年為始一切三餉各  
項錢糧蠲免二年其未經殘破而村落灰燼可憐者撫按仍分別速  
奏酌量蠲緩又向頒恩詔官胥蠹弊重派私徵蚩子遺豈能盡曉  
該撫按榜示即行梓布如有朦混前弊加等正罪餘各地方官要勸  
課農桑招來流徙革禁耗羨寬恤征徭使窮民均沾惠育百爾有位  
洗心易慮協力分憂各殫拯救之方共挽艱難之運庶幾寡昧類遐  
愆尤所有應蠲免地方條列於後云云於戲萬方罪在朕躬敢忘取



朽之懼群黎徧為爾德宜沛解懸之恩惟本固則邦寧亦安內而外  
靜布告遐邇咸使聞知

丁丑立賞格購李自成萬金爵通侯購張獻忠五千金官極品仍世  
錦衣衛指揮使餘各有差

已卯召山東武德道兵備僉事桐城雷演祚入朝初演祚奏范志完  
縱兵淫掠上詰其實演祚復奏志完兩年僉事遠陟督師不聞知

兵戰守徒恃賄躡陞非有大黨何以至是方建 攻德州不下去陷  
臨清越五日志完兵至聞陷景州欲避入德州夜漏下門閉託謝陞

方拱乾乘臣開門放汲求晤俱答以援兵非守陴之用督師非入城  
之官不聞薊州以夷丁內滑乎此臣所謂目覩最覩也中樞主計皆

喜虛文請餉須常例凡發萬金例扣三千故長安有餉不出京之謠

其他外官常例不勝枚舉兵部則推陞佑闕之價叙功視略為優劣

胡寇交訐惟添撫添督卸脫推諉今日設屯撫明日設屯廳徒為破

甌燃灰之巧圖何有金城棧之實用此臣所謂喜虛文須常例也  
庚辰議處李待問傅淑訓張國維逮范志完

內官監太監車大任仍提督南京織造  
故 姜紹武贈左都督

左良玉還九江亦大掠總督袁繼咸見良玉以楚撫王聚奎可給兵  
三百人良玉不聽巡按應天試監察御史鄭崑貞言根本重地諸臣  
日有條陳 陛下日有嚴飭然對君父則曰事、豫備相告語則曰



無可奈何輿輶異操築舍滋誤求一坐言而起行者無有也今剝膚之痛已在武昌明知其危而明諉之尚可謂國有人哉操撫合一之論即有乖舊制不可行操江當勅駐池州以控上游樞臣能明過議論虛恢全無實着操臣顧肇跡采石本其信地旣不一在陛下自有鑒裁也

壬午楊鶚為右僉都御史整飭薊州邊備巡撫順天召改家雲巡撫王繼謨

禮科給事中袁彭年論前大學士周延儒之罪奏曰使割絕私交早引公忠廉勇之士布列閩薊胡騎即入未必披猖至此又使視師之後以封疆耗散督撫罪狀實入告則懲前毖後或收補牢之效顧

皆不出於此狗庇欺飾即此一端罪不可追臣實負國又遑顧國論手哉

仍選武舉三科

癸未余文燿為大理寺左少卿

總理河道周堪廢報河決馬家口

甲申設太僕寺少卿於平涼

乙酉故何熊祥贈太子少保

夜大雷雨震奉先殿左鴟吻派火鎔插劍銅鐶

丙戌諭平賊將軍左良玉剿張獻忠於蘄黃母老師廉詢

戊子兵科給事中郝綱劾吏部文選郎中吳昌時禮部祠祭郎中周



仲連竊權附勢納賄行私為周延儒乾子內閣票擬事關機密事  
先知初推選即昌時語人曰允矣三日當下及引疾待旨語人曰已  
准回籍調理昌時何豫知如此總之延儒多慾則不剛有用而有體  
智足以掩過而忠不足以謀國思竊附於君子而不決去乎小人見  
忠直雖援護而實遠之見邪佞雖褻慢而實昵之是以辜負知遇耽  
誤封疆則延儒天下之罪人而昌時仲連又延儒之罪人也  
庚寅太子太保禮部尚書林欽楫上 東宮端本箴曰天祚我明誕  
膺多福累葉重光昭哉嗣服我 皇受命聖德中興緝熙典學宵旰  
求寧燕及皇天克昌厥後篤生元良執規履斗維此元良岐嶷夙成  
發祥麟趾泳耀前星人亦有之天下大器主器維艱守成匪易林

瞻仰赫、監視何以克副大本是端勿謂冲年少成若性群金在治  
範之成鏡勿謂睿哲日就月將如玉在璞近義其章奉新思孝問安  
事饋受篤進枝恩覃錫類接下思恭憲老尊儒耆以下賤哲而思愚  
左圖右史勿荒於逸玩物因功開養有益前師後保勿或衆休莊士  
如董宵人若猶桂殿璇宮勿謂未壯念彼經營作勞萬狀鼎羞法膳  
勿謂具陳念茲盤餐粒、若辛異志易投求諸非道美言滋疾藥石  
為寶情審易開防於未萌佳治伐性琴瑟調情虎觀餘閒閑習朝章  
圖懸金鑑檮辨南陽鶴禁還密周知民艱耕夫啼饑紅女號寒自昔  
帝王無逸作所夙夜兢、敬天法祖上帝臨汝母二爾心飭躬齋戒  
出入必欽 祖宗貽我有典有則不愆不忘聿昭明德瞻茲盛治聖



聖相依遯廟原本遇心提衡人心惟危道心惟微存養省察在未發時執中無為以守至正為天立心為人造命惟天依人惟仁長人天人交洽諸福駢臻皇錫嘉名以垂燕翼是訓是行服之無斁善作善述先後不違光被四表如日重暉一人元良萬邦有慶小臣獻箴敢告睿聖

辛卯 道御史蔣拱辰何倫各劾予告吏部文選郎中吳昌時貪險不法結錦衣衛喬可用藉其旗尉反為居停命昌時除名聽勘七月壬辰朔督修曆法光祿寺卿李天經言日食分數時刻與西法各有異同上與宮中親測西法多合令更考訂求其盡善  
甲午發帑金四十萬貯富新倉出陳納新毋輕動

乙未命駙馬都尉冉興讓告太廟災異諭百官脩省

丙申李建泰為吏部左侍郎

戊戌葉初春為太僕寺少卿

己亥命加擢卓異四川按察使張有譽等

召雷演祚及范志完面質於中左門問志完兵淫掠又金銀鞍數千兩馬百匹託左諭德方拱乾行賄京師果否演祚歷一有指因召拱乾入 上問演祚前踪云稱功誦德徧於班聯者誰也曰周延儒招權納賄如起廢清獄蠲租自以為功再考選科道收於門下又幕客董廷獻居間凡求巡撫總兵先付金銀於董託收玉帶二珍珠十三顆作暗記經部推延儒揭請則故輔馮銓子源專送物回家 上怒



即命緹騎逮董廷猷因問興屯曰此國家大事巡撫如袁繼成周應  
期皆用得其人但道臣如曹李之華錢繼登楊春育孫謀俱墨  
吏借此求官上又問志完逗留掠狀志完辨訖上問爾馬石  
匹送方拱乾金鞍一又數千金餽誰志完謝無有是日臣在大王莊  
副總兵賈芳名等單騎敗建五百又河南值建四千大風卻之  
上斥其妄又問駐德州四旬何支五日餉演祚曰彼兵止欲折乾  
若趙光忭兵有紀律道山東不索餉上曰光忭脩河間城亦逗留  
何不叅也曰趙兵實不擾上命演祚起問御史吳履中爾在天津  
察志完云何履中對如演祚言志完飾辨上曰光忭亦縱寇逗留  
獨叅志完難服其心命錦衣衛即逮光忭總兵薛敏忠等而方拱乾

入辨未嘗受賄如馬百匹尤易見跡上頗然之乃退

庚子督師孫傳庭以總兵牛成虎為前鋒高傑將中軍王定官撫民  
率綏夏兵為後勁檄左良玉赴汝寧夾擊

辛亥南京兵部尚書熊明遇罷

吏可法為南京兵部尚書高弘圖為南京戶部尚書改胡應台為南

京刑部尚書

方國安合副將徐懋德馬士秀步騎二萬擊賊于大冶斬首千級

議處鄭三俊逮張國維侯恂以秉樞不職棄開封不守也并責給事

中方士亮郝綱御史蔣拱辰兵部職方郎中尹民興

甲寅停選九嬪



趙王常汲求從城西蟻尖寨後寇平還彰德不許

乙卯上自訊吳昌時於中左門拷掠至折脛乃止併逮蔣拱宸俱

下獄尋徵周延儒聽勘

金之俊改巡撫昌平

諭各鎮秋防在即夕月西郊毋入衛

丙辰免各省直崇禎十二年前上供紗綾紙等

丁巳諭德項煜方拱乾為左庶子兼翰林院侍讀

議郵政總督盧象升洪承疇并覈各死事文武官

己未戒廷臣私謁內侍果有事朝房摘之

徵山東漕儲道按察副使方岳貢

上聞宛平大興預稅明年行戶下巡城御史察之

庚申出千金資太醫院藥療疫自春二月迄今京師大疫死亡無筭

日以萬計鬼物盡見內侍提舉所得鏹幣日夕收之皆紙也是後市

上各設水缶辨金錢浮沉又出二萬金下巡城御史收殮

兵部職方員外郎朱希萊請察援兵餉籍從之

是月都察院左都御史李邦華請保東南先自臣卿始江撫宜駐

九江贛撫宜駐安南瑞兵備道宜駐寧州分巡湖西道宜駐永新

分守饒南九江道宜駐南康又江濱民多近賊非不肖有司迫之何

至悖謬若此故欲剿盜不若使民不為盜

八月壬戌朔癸亥光祿寺少卿路振飛為右僉都御史總督漕運巡撫



鳳陽

召總督京營恭順侯吳維英協理京營兵部右侍郎王家彥前巡撫  
密雲王繼謨及路振飛方岳貢於中左門

常國安戰金沙洲奪賊舟百艘賊焚餘舟嬰城自保

甲子四川按察使張有譽為應天府丞

乙丑太子少保戶部尚書武英殿大學士陳演少詹事兼東閣大學  
士魏藻德主禮闈故事內閣首次主試時推四人陳演蔣德璟黃景  
昉魏藻德上命演藻德皆有成心故不數日景昉予告

河南補鄉試主考吏部文選司員外郎郭萬象部主事  
諭兵部逮失守卹死事各官

丙寅方岳貢為都察院左副都御史

左良玉遣馬進忠復武昌遂復漢陽及屬縣

太子少保左都督杜弘域為安廬水陸總兵官

張獻忠復陷岳州至臨湘知縣莆田林不息死之初沅撫李乾德總  
兵孔希貴以兵二萬守城陵磯令岳州民他避以軍士詐為民迎賊  
賊入城伏發盡殲留四賊割耳貫箭縱回獻忠怒益兵進攻乾德立  
虛營旁林植旗伏砲積薪其上賊以火攻之砲發殺賊數百人益怒  
水陸並進乾德飭戰艦中涿度矢石可及即止已賊矢礮盡奮擊大  
敗之三戰三捷獻忠悉衆二十萬圍岳州力屈城陷乾德希貴俱走  
長沙至臨湘知縣莆田林不息死之



戊辰兵部尚書馮元飈引疾左侍郎張伯鯨攝部事

張獻忠掠湘陽尋陷咸寧蒲圻前鋒至湘陰分軍為二趨長沙一上  
荊州獻忠欲北渡三卜于洞庭湖神終不吉

己巳應天府教授何九雲奏會試許之

庚午奪兵部右侍郎張鳳翔下刑部責其諉避不議推督撫也

辛未裁南京操江都御史時罷鎮遠侯顧肇跡以誠意伯劉孔昭代

孔昭因召對泣陳文臣掣肘事權不一故有是命

兼城伯李國楨總督京營戎政恭順侯吳維英改領後軍都督府都

察院左副御史惠世揚以輕處鄭三俊削籍

前諭入覲官薦將才令兵部彙上并文武大臣科道所舉堪督撫總

### 副者

談遷曰語曰上求材臣殘木上求魚臣乾谷天子銳意圖治屢側

其席而當事精玩反啟倖竇此奔彼競甲狗乙緣凡語貌之夸蕩

資性之跌逸俱督撫總副也朝為受事夕為覆軍雖三尺不之貸

猶嗜進不已罔圖成市中外互蒙莫之能救矣

孫傳庭師次閩鄉李自成會諸賊于河南自汜水至滎澤伐木渡河

總兵劉弘起以兵拒之乃退

乙亥議京西扼險京東聯絡分守

司禮太監王承恩督察京營戎政韓贊周守備南京

丙子大雨雪



出二萬金市馬

夜月食

丁丑永王出閣就學翰林院檢討方以智傳鼎銓待詔呂和陽陳臯  
謨侍講讀中書舍人史起何其達侍書

都察院左都御史李邦華上言人臣奉法脩職不幸而死官朝廷雖  
不靳惟蓋之施在臣子何嘗有希冀之想然死亦殊塗矣或庸愚尸  
位靡所表著或履豐席盈未嘗艱楚或血胤有託箕裘丕振則溘焉  
長逝無以繫人深長之思而草木同腐之輩即上恩弗逮衰謝亦為  
固然無足惜者故左副都御史張瑋數歲而孤險阻無所不經筮仕  
樞曹端介著蔚衛文嶺南公明無比備兵江藩訓飭有方及進丞南

京兆救荒勞瘁歷任佐院振揚風紀乞病殞身敝篋故衣超然遠舉  
上無負朝廷下不負其學術且暝矣遑顧去後而秉彝在人惻隱  
難昧乞賜卹典風厲人群俾知立身行道之士不因存沒為顯晦所  
關世教非淺小矣從之

總兵牛成虎敗賊于洛陽追至汝州以無繼退屯浞池

庚辰誠意伯劉孔昭提督操江給三萬金治舟械守備太監韓贊周  
給五萬金資操練

張獻忠斂舟數千艘將北渡倏風起覆百餘舟溺數千人復還岳州  
盡殺所掠婦女投之江焚其舟四十里宵江如晝遂陸行向長沙

壬午大雷雨



丙戌張獻忠陷長沙總兵尹先民何一德降賊先是武昌陷承天巡撫王揚基率所部千人奔長沙推官蔡道憲請還也岳州謂岳與長沙唇齒也併力守岳則長沙可保而衡永無虞揚基曰岳非吾守也道憲曰棄北守南尚不失為楚地若南北俱喪亦未見謝過有辭也揚基語塞道憲復請屯岳乃勉赴岳州及賊入蒲圻揚基遂揚帆南遁及王聚奎至亦自保駐袁州逗留不進道憲復請屯岳州聚奎屯岳數日仍檄徙南沙道憲曰既無恢復之志岳州無恙不於此時繕兵固守乃棄之南下賊攻岳尚慮長沙為之援若岳不守長沙豈獨全哉聚奎不納驅萬餘人入長沙所過牒犒薪黍如洗慘甚於賊聚奎聞道憲守禦之策條上四事弗善也賊偵聚奎走率衆南下聚奎

欲遁託言曰前者蔡推官所議甚是吾固欲言之當親率兵於外任戰推官內守即夜乘小舟馳百餘里入湘潭矣聚奎去巡按御史劉熙祚以吉王由走衡州矣未賊見帥旗下無一人笑而裂之至城下呼推官曰吾軍中皆知爾名勸吾勿犯可速降毋自苦也道憲不應弩射之獻忠怒攻三日夜而陷執道憲百計誘降不可得之健卒林國俊等九人追侍道憲賊勸道憲降時國俊曰如吾主可降亦去矣不至今日賊云不降爾亦不得生國俊曰若我輩願生亦去矣不有今日賊併殺之內四卒奮然曰願且延旦夕莖主骸而後受刃賊許之於是四卒解衣裹骸莖之南郭四卒自經甲申五月贈太僕寺少卿乙酉十月加贈太僕寺卿謚忠毅道憲字元白晉江人崇禎丁



丑進士授大理推官憂去起補長沙治績甚著  
唐寅分故守河南道副使吳橋王胤長贈光祿寺卿  
張猷忠陷衡州

李自成築七城於襄陽城西驅難民誘官兵斬獲皆吾人也總督孫  
傳庭不知其詳奏賊聞臣名皆驚潰臣誓肅清豫楚不以一賊遺君  
九月壬辰朔諭吏部都察院有司多闕今會試副榜百十二人定銜盡  
行除補到任有願再會試者聽  
上聞都人疫諭脩省釋輕繫

大學士黃景昉予告

巡撫延綏右僉都御史崔源之免

癸巳周王

恭柩定居彰德

甲午劉士楨為應天府尹

丙申張猷忠陷寶慶

己亥總督孫傳庭次汝州偽都尉李養純率所部來降知賊并兵守  
寶豐進擊賊堅守不下

辛丑攻寶豐賊救至總兵白廣恩中軍高傑分擊之已克其城擒偽  
州牧陳可新斬數千級  
壬寅孫傳庭自朱仙鎮而南大雨六日糧車日行三十里又道淖未  
至士馬俱饑或勸傳庭旋師就運傳庭曰吾軍行已六七日度即還  
軍亦饑寧能濟乎要當破一縣就食



甲辰攻郊縣入之俱窮民騾羊二百餘頃刻分饑食盡不足給  
丙午策貢士陳名夏等四百人於皇極殿賜楊廷鑑宋之繩陳名夏  
等進士及第出身有差

諭朝臣凡失事定罪戰守定賞俱限奏十日餘犯矜疑可速結毋再  
延朕久服浣濯衣今日減膳外各衙門裁節事宜各條對

丁未吉王由桂王常瀛並至永州御史劉熙祚護吉王抵衡州值  
桂王走永州迎之方舟而前

己酉命河北山西就近餉孫傳庭兵時傳庭前鋒盡收賀一龍左金  
王故部皆致死于賊而高傑悉賊情形三戰三捷自成奔襄城自守  
食匱有飢色

都察院左副都御史方岳貢言四事清言路以正人心定推陞以養  
廉耻青吏治於荒殘宜選擇良吏儲將才於部伍宜專精校閱上  
是之

庚戌張獻忠追二王於永州官兵星散夜至茅栗鋪執巡按御史劉  
熙祚誘降不屈時獻忠分軍為三一往永州一入全州一犯袁州獻  
忠歸長沙開科取士

辛亥張伯鯨為兵部左侍郎  
壬子孫傳庭軍乏餉兵噪于汝州

癸丑劉芳名為署都督僉事總兵官鎮守柳溝榆林李守錄為都督  
僉事總兵官鎮守居庸昌平



甲寅作新鈔戶部尚書倪元璐上言內發鈔式四文命臣詳議鈔法  
歲有五千萬之入籌國長計孰便於斯而或以久廢乍復人則駭之  
不知此即民間之會票也宋時謂之錢引終元之世錢法不行尚爾  
用之不匱况復化裁通變稽古宜民予主事蔣臣上八事曰速頒榜  
文十七年三月製鈔秋冬間行約行鈔五千貫可蠲賦五百緡曰詳  
筭界法歲行五十萬五歲為界一界之後以舊易新曰製作宜工御  
前頒背水研質厚文清民間難倣約費五釐一張曰倒換宜信每鈔  
一貫納銀九錢七分通行輸官俱准銀一兩換錢千文曰推行宜審  
有同於出入抑勒或私取金銀計贓定罪盡徙其家於邊屯田自贖  
曰積儲宜裕歲入五十萬量留其一於郡縣積穀曰早開鑄局頒鈔

法即宜頒錢法曰設重宜重錢法以部侍郎督理寶源局又有專官  
鈔法亦宜增設

談遷曰國初行鈔法匪獨祿賜已也民輸賦賈輸稅俱兼金錢而  
三之上下相通其後賦稅專以金鈔法遂墜倪司農曉人也議復  
鈔法欲專行於民間而不得上輸則自闕之道矣且鈔一貫納銀  
九錢七分易之在官其衡必重或胥史例索是易一空鈔費一金  
不止雖甚愚不為也孔子曰因民之所利而利之利不通於民庸  
可膠古而強之乎今日廟議大概盡併此是類也

孫傳庭兵潰於襄城降盜李際遇陰通賊謂官兵疲矣賊大至傳庭  
問諸將若何總兵高傑請戰白廣恩曰吾軍困宜駐師分據要害步



步為營以薄賊易耳傳庭恐賊走廣恩曰即賊走我乘而擊之士氣倍奮傳庭曰將軍何怯獨不如高將軍耶廣恩不懌又前覲總統各營方快引所部八千人去之傳庭無如之何賊前鋒曰三堵牆其隊一紅一白一黑各七千二百人紉重布為甲刃矢不能入接戰而敗陷泥淖中殺傷三四千人高傑立嶺上望曰不可支矣麾衆退退入於河死亡四萬人餘傳庭傑以數千騎走河北值巡按御史蘇京京曰君自為計我當以實聞

乙卯故兵備僉事趙輝贈光祿寺少卿故

李時堯贈太常寺

卿故霸州同知丁師義楊佩顯並贈山東布政司右叅議故

徐耀雲贈國子監助教故

趙國光范光鼎並贈宛平知縣故

柯茂虹贈良鄉縣丞

進定國公徐允楨太子太傅寧晉伯劉光溥太子太師彰武伯楊崇猷少傅宣城伯衛時春少保皆督巡著勞也

丁巳上聞李自成在滎陽汜水密禹間趣孫傳庭掃邊

召進士陳丹衷於德政殿丹衷請身往廣西募土司兵

戊午李自成攻潼關白廣恩擊破之賊不退孫傳庭亦回潼關衆尚

四萬

庚申張獻忠殺巡按湖廣御史劉熙祚於寧鄉熙祚字仲緝武進人天啟甲子貢士崇禎甲戌知興寧秩滿擢御史永州陷題壁二首控總軍旅已逾年家室迢遙久別顏南北骷髏多作壘湖湘宮殿倏成



烟鷓血不啼無塚骨烏偏集有情田死生遲速皆前定堅此丹心  
映楚天其一故園隔別又經年今顏非復舊時顏山川草木俱含泪  
攬琳旌旗盡作烟老婦漫勞尋蝶夢兒孫切莫種書田長弘化碧非  
豪事留此孤忠向九天其二熙祚年五十七弘光初贈左都御史謚  
忠毅

程註為南京工部尚書趙維岳為刑部右侍郎施邦曜為通政司使  
並南京張鳳翼為右僉都御史巡撫延綏

寇陷蒼溪縣

是月總理京東山海永平天津宣大屯務右副都御史周應期言各  
道所報有一邑荒千五六百頃有通邑不滿千頃詳詢其故若積逋

苦雜差而雜差中如驛馬俵馬芝蔴棉花絨等尤苦富人傾貲畜人  
逋逃即日募墾種何益皇上痛念殘地特免錢糧二年則內庫芝  
蔴花絨等皆免矣與其發帑而勸耕不如使民自耕為長策與其避  
役而招集不如先寬其役為至恩

十月辛酉朔副總兵沈萬登復汝寧府萬登本汝寧大俠也聚鄉勇萬  
餘人李自成偽授威武大將軍不受總督鳳陽馬士英版授副總兵  
是日偽威武大將軍馬尚志差任萬登潛遣謀入城因擁衆入斬五  
百級誅尚志獲印擒汝寧偽防禦使金有章偽府尹鄧璉偽推官鄒  
士麟偽汝陽令樊仲表偽固始令呂相周偽汝陽主簿胡定國偽學  
正胡朋偽汝寧府學正薛清鎮汝都尉侯可畏陳士榮吳勉黃袞龍



馮執

總兵劉良佐等以鳳泗兵副總兵馬得功以禁兵合趨潁州沈丘  
壬戌召廷臣於中極殿令各舉清吏

李佺臺為南京光祿寺卿高斗樞為太僕寺少卿

守備王民康復光州擒光州牧方燧偽判官鄧來鳳

偽將李過陷闕鄉

癸亥加正一大真人張應京太子太保

徐州副總兵金聲桓討蕭碭諸盜平之初蕭縣盜王道善等陷縣城

焚徐州北關柵涼盜程繼孔合之永城餘寇朱安世燕青等相煽於

徐宿歸永間聲桓以九月丁巳會兵分討程繼孔請降以兵守之是

日拔諸寨斬二千八百

山東總兵劉澤清圍沈丘偽令周維新堅守不克

李自成間道緣山崖出潼關後夾攻官軍大潰總督孫傳庭死之或

曰李過追孫傳庭獲督師坐羸疾馳潼關詔守卒乘間突入巡按御

史金鉅峒走河上渡免後聞傳庭竄五臺山為僧

甲子起馬岱都督同知總兵官鎮守保定

李自成結陣而西連陷華州渭南殺渭南知縣楊暄鄉官禮部主事

南居業

馮士英進兵河南副總兵莊朝樑以三千騎來會汝南道韓煜復息

縣擒偽令張文彬義兵帥申夏志復上蔡擒偽令熊新運



大圍堡土賊勾張其在圍萬載知縣  
龍城縣 遁賊二千餘入城三日改

乙丑開建 屯山海關外總督王永吉趨山海永平發內帑金八萬  
戶部金十萬資餉

余應桂為兵部右侍郎張縉彥為左侍郎添設徐啟元為右僉都御  
史提督軍務兼撫治鄖陽

李自成陷臨潼

張其在陷萍鄉掠嶺賊分萍鄉醴陵境上檄萍鄉知縣造舟獻馬於  
是瑞素臨江新喻分宜之人俱空

丙寅諭有司贖緩除留額積穀外俱充餉

諭兵部撫賞薊密宣大屬夷

都督僉事杜應登為總兵官鎮守通州

巡撫陝西右僉都御史馮師孔知寇棘急入西安收保午刻設城守  
俄寇至是夕高傑逃至不納寇攻城

丁卯科給事中龔鼎孳下獄

巡撫遼東右僉都御史黎玉田報建 牛車二百餘輛運砲薄山海

關 上下兵部計之尚書馮元飈與疾口畫

戊辰李自成陷商州屠之殺商洛道兵備副使黃世清寇屠商州關  
中人心瓦解

諭兵部曰孫傳庭負任削督師尚書銜以秦督充為事官扼守關隘



圖効自贖復諭兵部晉豫任東西撫各整兵駐河上不許一賊窺渡  
已已選給事中御史八人助守畿郡勲臣

運炭西山

援剿總兵官白廣恩加邊寇將軍給兵三萬

庚午左春坊左中允兼翰林院編脩馮世奇翰林院編脩楊昌祚主

武闈

翰林院脩撰劉理順編脩楊昌祚吳國華為左春坊左庶子

禮科都給事中沈胤培請改庶吉士從之額如天啟壬戌

張猷忠陷常德

張猷忠部將高

以二百餘人趨連州南霸兵備副使無錫王孫

蘭駐韶州兵不滿百使十輩請兵得羸卒七百人復以他警一夜撤

去至是聞之遽自經知州

踰城遁樂昌乳源仁化自潰韶州吏

民繼而逃盡賊未至後奏賊陷連州非實也

辛未薛所蘊為國子司業陳應元為南京太僕寺卿

兵科給事中曾應遴奏孫傳庭處置失宜致白廣恩生心西奔各營

隨之為賊所乘或言廣恩與高傑不合掉臂而去則廣恩固可斬也

上方信廣恩不聽

張猷忠以千人屯袁州北張家口是日張其在自瀏陽萬載會袁州

人俱迎降脅知府霍

冊印不從懷印走攸縣賊白旆鳴礮入

袁州北門左良玉以副總兵吳學禮援袁州次於新喻明日次分宜

壬申括民間廢銅鑄錢戶部尚書倪元璐奏有司罰贖減平徵銅如



稍有力微一兩三錢僅輸價直六錢五分  
起任濬兵部右侍郎兼右僉都御史總督河南湖廣軍務兼巡撫河

南

癸酉前部侍郎董應舉卒

午刻西安城陷以守將王

趙

內應也巡撫右僉都御史原

武馮師孔樓祭使羅山黃綱長安知縣山陰吳從義西安右衛指揮

崔爾達俱投井死秦府右長史會稽章世綱自經紳士死者甚衆前

巡撫大同右僉都御史三原焦源溥罵賊磔死前山西布政司叅議

咸寧陶爾德被殺前懷慶通判咸寧竇先儀叛前儀封知縣長安徐

方敬萬曆壬午貢士前芮城知縣咸寧劉芳聲萬曆壬午貢士並投井死前巡撫宣

九

府右僉都御史三原焦源清前河南磁州道叅政咸寧祝萬齡自經

萬齡子于辰諸生也亦從死前山東監軍僉事涇陽王徽七日不食

死解元南鄭席增光入山不應徵死都司吏立從周罵賊死左布政

使平湖陸之祺等俱降援剿總兵白廣恩逃而追降之李自成據秦

王府封秦王存樞權將軍永壽王誼沉制將軍世子妃劉氏曰國破

家亡願求一死自成遣歸外家賊分兵下屬縣蒲城知縣朱一統議

守從卒俱散賊脅其降詔以更衣袍印投井死初自成在楚議所向

政府侍郎牛金星請先取河北直擣京師禮政府侍郎楊承裕欲

先據留京斷漕運兵政府從事顧君恩曰否如先據留京勢居下

涿雖濟大事其災失之緩直搗京師萬一不勝退無所歸其災失之



急不如先取閩中為元帥桑梓之邦且秦都百二山河已得天下三  
分之二建國立業然後旁掠三邊資其兵力攻取山西後向京師庶  
幾進有可攻退有可守方為全策自成從之賊好殺掠牛金星勸以  
不殺遂嚴戒其下自稱奉天倡義文武大元帥民間安堵輒相誑惑  
人無鬪志秦藩富甲天下先是戶部尚書倪元璐奏天下諸藩無如  
秦晉山險用武固也宜諭兩藩以剿賊保秦青秦王以過賊不入青  
晉王兩王能任殺賊不妨假以大將之權如不知兵宜悉輸所有與  
其齎盜何如享軍賊平之後益封兩藩各一子如親王亦足以報之  
矣兩王獨不鑒十一宗之禍子賢王忠而熟於計必知所處矣跡上  
不報雲南按察使臨潼任中鳳賈表至寶雞聞西安失守遂道服入  
華山次年其兄中麟以山東督學棄官至偕隱中麟甲戌中鳳

進辛未

談遷曰孫傳庭合十萬之師兵甲糧芻俱取辦閩中民無餘力并  
銳出閩全師覆潰秦人重足而立勢不自固潼關失守喘息已奪  
惜哉以百二之險匹夫振臂而隳之易如拉朽諸紳民殉難皎然  
不污所稱西京重節義非耶獨歎國家敦親之誼甚渥而諸宗多  
不獲首丘類淹抑以死如秦晉號富甲天下其不自引決將以朝  
菌之壽榮寡人乎

馬士英以副總兵屠師賢復陳州擒偽州牧洪翼聖偽判官初安國  
汝寧義兵復信陽州擒偽防禦使黃閣偽州牧黃珩閣江陵貢士翼  
聖安國俱荊州諸生



吳學禮以都司蒲秉良三百騎趨袁州

都督同知唐鈺為鎮朔將軍總兵官鎮守宣府給三萬金兵六千馬三百

甲戌授進士陳丹衷河南道御史同副總兵成大用往調廣西土司兵賚土司銀花蟒衣絹

數南塲壬午殊墨先是南榜出宦室子登七十三人物議籍周延

儒弟正儒子奕封預為延儒自言於工特賜二百金箱輿口遂莫

敢言

汝南道韓煜合鳳陽兵河南義兵克沈丘初偽令周維新力守我作

木牛藏壯士以泄濠水坎其城邑人懼縛獻維新及典史司廣學正

胡澄壽偽汝寧府學正胡朋德

分

吳學禮圍袁州偽將丘仰寰拒守我都司高山先登擒斬二千四百

餘人獲馬六百追斬丘仰寰復袁州時袁州臨江吉安人多逃山谷

官兵淫殺獻俘於是村豪皆屯結山谷拒官兵巡撫郭都督檄徹兵

回九江招安土著戍三郡

丙子工閱勲臣武臣子弟騎射

丁丑張其在陷吉安府殺把總崔官兵既撤賊自長沙突至分

巡湖西副使岳虞巒方閱軍於郊俄報賊至皆潰虞巒微服遁署府

通判朱奉銳推官韓日將俱遁吉安知縣沈中柱永新知縣黃受封

署安福通判邵夢柯泰和知縣劉國良諸縣同日而陷賊分兵設偽

官改吉安為親安府廬陵為順民縣張其在檄袁州人先逃賊復



入表州  
戊寅工自用銅錫木器屏金銀命文武諸臣各省約戒官紳黃藍  
絹蓋士子紅紫衣履庶不錦繡綺紵金玉珠翠衣飾俱論違制  
談遷曰先帝身先儉德減膳卻珍服浣濯之衣而臣民奢習如  
故終莫之革者以名美而朝夕異令也督撫月易內帑歲遣徵租  
之使不避災旱大本已撥雖屢下尺一特故紙玩之屋漏在上知  
之在下諒哉

貢士祝淵削籍下鎮撫司以前跡救劉宗周詰所使也

己卯故兵科給事中周而淳贈大理寺右少卿

庚辰項煜方拱乾為少詹事兼翰林院侍讀學士李化熙為右僉都

御史巡撫四川

李自成改西安府曰長安禁鄉民短後衣明年糧每石徵一兩二錢  
今冬每石折草六千斤輸長安各縣遣騾三百徵粟千石大其斗榜  
掠巨室助餉渭南工部尚書南居益掠死涇陽前按察副使楊國柱  
黃冠遁去

禁諸生刊稿

辛巳復故總督盧象升官

守備鳳陽太監谷國珍奏地屢震

癸未故劉大金贈光祿寺少卿

總督九江呂大器以五千入援吉安次峽江邑人執知縣以待賊反



拒援兵。詔之曰：張獻忠至矣，邑人出迎，獻印及馬二十五，官兵入城，斬奸民殆盡。  
李自成分兵略廊延中，部知縣朱新選闔家自經。前漕儲道叅政安定，張國紳居西，安自成召見，稱殿下語，次自成大悅，曰：予不喜得陝西，喜得先生授刑政府侍郎。國紳同年文翔鳳，其繼妻鄧氏能詩，薦於自成，召為後宮內師。

張獻忠在長沙，益招亡賴，立九營，左良玉合馬進忠之騎赴袁州，萍鄉馬士秀以步兵上臨湘，岳州楚北撫王揚基巡按黃澍駐漢陽，左良玉以惠登相規復襄陽，劉洪起規復南陽，免懷安桐城田租。

命各巡鹽御史以辛巳壬午癸未三年附正引配銷，仍以癸未正額配銷，壬午正引。

甲申都察院左都御史毛士龍罷。

乙酉大學士王應熊入朝，陛見請老，許之，賜金幣，應熊以周延儒薦起，上尋悟其非時，遣緹騎趣延儒入日，遣人偵之，知延儒約應熊密語，又令其先抵京，而身繼之，上怒，延儒久延，遂不敢滯，應熊至，良鄉上章，閣臣擬旨有延佇等語，上塗去。

張獻忠遣馬賜以千人，下臨湘取米及釜，方國安令戎旗營叅將方元科進次蒲圻。

鳳陽兵平汝寧，土寇略盡，淮徐道何騰蛟招降程繼孔、蕭錫俱平會。



閩中潰鳳泗大震馬士英檄其兵歸屯壽州  
丁亥改李化熙巡撫陝西

戊子禁惡錢

朱之臣為南京鴻臚寺卿

太子太保禮部尚書林欲揖致仕

兵部尚書馮元颺罷元颺在任文符填諉不能決託疾杜門上嘗

陰託人賄求邊將不納故得善去

己丑給唐鉦三萬金領兵六千馬三百

庚寅兵科都給事中張縉彥為兵部尚書余應桂仍以兵部右侍郎

兼右僉都御史總督陝西三邊軍務周文光為右僉都御史巡撫四

十

川應桂聞命飲泣陛辭曰不益兵餉臣雖去何濟上默然發帑金

五萬銀花四百銀牌二百蟒紵二百色絹四百馬一百給軍蓋欲應

桂聯絡甘肅延寧之兵收拾三邊健勇相機撫剿也應桂趨河上

不進

故 總兵曹變蛟贈太子少保廕錦衣衛指揮僉事

十一月辛卯朔御史霍達監軍陝西

前督師丁啟睿以家兵復新蔡擒偽令聞聖諭

諭臣民助餉立功者錄之

壬辰呂大器兵復吉安府尋及廬陵吉水

癸巳張猷忠兵下岳州沿江設伏藏輕舟於汊港浮巨艦重載順流



下副總兵王世泰楊文富以三千人邀之賊逆派佯走以誘我兵爭利溯派工盡奪其背舟重不即行賊輕舟四出圍之步騎夾岍橫擊殺溺亡筭方國安徐懋謙等合救文富世泰等身免喪師二千岳州城空賊疾趨岳州我不及救又陷武昌大震撫按俱艤舟於江待東下武昌城空左良玉以前鋒上武昌

總兵王定副總兵高傑自渭南敗各奔延安李自成命田斌守西安自往塞上

甲午高傑聞賊耗率所部渡河而東入山西王定奔榆林李自成入延安大會群盜馬萬匹旌旗數十里於米脂祭墓又五百騎按行鳳翔守將誘而殲之自成怒親攻鳳翔屠之

張獻忠命尹先民守茶陵分兵守岳州餘回長沙

丙申土國寶為都督僉事總兵官鎮守河南

己亥諭左良玉移鎮武昌同撫按王揚基黃澍相機滅賊

詹事李紹賢予告

辛丑巡撫王揚基以辰州兵二千左良玉兵一千復黃陂孝感游擊

郝成才守漢州

總督九江呂大器以安慶兵上樟樹鎮官兵分道上高萬載趨袁州大器又招柯氏兵赴南昌降瑞昌德安土盜鄧毛溪携之從軍素無紀律柯兵射死鄧毛溪其黨千餘仍為盜柯氏兵三千亦亡千人甯科給事中郝綱總兵許定國從余應桂自効



壬寅李景濂為南京國子同業  
試進士館選  
承天太監何志孔奉命勞左良玉進少師蔭錦衣衛百戶賜金蟒牛  
酒吏卒各陞秩賜二千金  
高傑至絳州巡撫山西蔡懋德招之共擊賊王老虎破之追至曲沃  
王老虎降獲步騎萬人  
李自成發金數萬招榆林諸將繼以大兵遣偽權將軍李過率兵七  
萬攻之時巡撫張鳳翼未至人心洶、總兵王定聞賊至以數十騎  
出塞聲言借西虜分守游擊劉廷傑與榆林兵備副使都任及故總  
兵王世顯侯世祿侯拱極尤世威副總兵惠顯等歛各堡精銳入鎮

城集衆問之曰若等守乎降乎各言効死無二遂推尤世威為長主  
號令繕兵甲賊說三日不聽賊攻榆林城、上強弓勁弩疊射賊屍  
山積更發大砲賊稍却

諭兵部令左良玉鎮武昌

癸卯張獻忠復陷鄖陽

甲辰李自成遣試郡縣諸生上等任六政府從事次任守令又次任  
佐貳

左良玉兵復萍鄉

乙巳金之後為兵部右侍郎添設何騰蛟為右僉都御史巡撫湖廣  
丙午井陘道楊汝經為右僉都御史巡撫甘肅汝經雲南



人貢士樸誠有實用  
李自成攻寧夏守將分營逆戰三勝之殺賊數千人  
丁未設南贛兵三千以副總兵鄭鴻逵統之

巡撫應天右僉都御史鄭瑄移鎮蕪湖又徙池陽池陽叅將黃斌卿  
左良玉以副總兵張應元吳學禮盧鼎守九江自同馬士秀等舟師  
入武昌直搗長沙賊復合馬進忠等以騎趨袁州吉安迎擊其前  
已酉諭兵部已復驛傳令聞大吏仍自津則前節省銀安在其察明  
申飭

楚府奉國中尉蘊請從軍自效下部議  
進襄城伯李國楨太子太保詹錦衣衛百戶

庚戌進李虞夔右副都御史王都為太常寺卿

瑞王常浩棄漢中走廣元

辛亥吏部右侍郎李建泰都察院左副都御史方岳貢兼並東閣大  
學士直文淵閣

李自成歸西安檄諸路兵往寧夏關中賊自成敗竿子手數萬東奔  
高維出潼關散入河南

定翰林院庶吉士朱精周鍾劉餘濟史可程梁清標成克鞏羅憲汶  
史垂譽魏學濂張元琳楊明琅魯果吳爾壇黃燦劉廷宗萬發祥姚  
文然張玄錫王自超胡統虞李長祥劉肇國龔鼎何胤光楊棲鶴白  
胤謙張家玉李化麟傅學禹魏天賞高珩趙頰何九雲李呈祥張端



呂崇烈表王老成 蘇高學馬路 天官高此 蘇何此 蘇李是 蘇武  
都督僉事李棲鳳為平羌將軍都督同知總兵官鎮守甘肅葛如芝  
為征西將軍都督僉事總兵官鎮守寧夏  
壬子起御史梁士濟鄧起隆  
李自成復往攻寧夏

馬進忠次臨江監軍僉事嚴德光以兵來會  
癸丑故吏部 郎中宋應亨贈太僕寺卿

誅前督師范志完總督趙光忭總兵薛敏忠吏部文選郎中吳昌時  
光忭九江人天啟乙丑進士授 嘗劾內監鄧希詔涿廣

西十五年賂周延儒歷薊遼總督受事未幾竭貨享士與范志完縱

敵同禍聞者傷之昌時敗論贓五萬金涿妻子二千里  
故督師大學士吳姓戍金盞衛同妻往

出南京各監局廢銅鑄錢

甲寅總督宣大兵部右侍郎孫晉罷晉附門戶攬權善宦出鎮未久  
得善去

馬士秀郎啟貴楊文富王世恭等復臨湘斬四百級賊奔岳州追之  
偽將混天龍以步騎數千拒南岬又輕舟數十順涿下邀我士秀三  
分其軍且戰且行引滿交射前軍直上出賊舟後反擊之盡驅中軍  
圍賊殺溺幾盡南岸賊走入城士秀乘之賊不及守突出走長沙斬  
四千四百四十二人遂復岳州



巡撫徧沅李乾德總兵溫國珍屯沅州副總兵劉承胤守武岡守備  
曾志建守道州

乙卯馬進忠出分宜賊盡走袁州  
起沈自彰吏部文選郎中

丙辰改呂大器為南京兵部右侍郎黃鳴俊為右僉都御史巡撫浙  
江黃家瑞為右僉都御史督理淮揚等處鹽法軍餉何謙為右僉都  
御史巡撫昌平

馬進忠前鋒營副總兵徐國棟常國安杜應金叅將黑雲祥趨袁州  
馬進忠王允成繼進賊西遁逐之三十里擒偽守道蘓明偽監軍李  
天根偽知縣王志宏偽教諭吳良才偽中軍郭守恒斬二千八百六

十五人奪馬五百三十弓矢數萬遂復袁州

丁巳榆林城陷自望日被圍吏卒力戰殺賊亡笑賊攻益力諭旬不

克賊以衝車環城穴之東南城崩數十丈賊入之兵備副使襄陵都

任闔室自經餉司戶部郎中黃岡王家祿被殺總兵尤世威縱火焚

其家百口揮刀突戰死諸將各率所部巷戰殺賊千計賊大至我矢

盡刀折殺傷殆盡無一降者餘勇千餘突圍而出投虜中賊問首倡

守城者誰游擊劉廷傑厲聲曰阻降堅守者廷傑也死無恨賊遂副

之副總兵惠顯罵賊不屈支解而死千總馬鳴節一家自殺闔城婦

女俱自盡總兵自尤世威外侯世祿侯拱極王學書王世欽王世國

李昌齡副總兵則尤翟文常懷德李登龍張發楊朋游擊孫貴龍養



崑守備白慎衡李宗叙千總馬鳴節皆廢弁也守將則游擊傅德惠  
憲潘國臣李國奇晏維新陳二典劉芳馨文侯國守備左勉惠漸賀  
以雷楊以偉榆林衛指揮李文焜葉顯忠李應孝馬應舉等及千百  
戶數十人榆林為天下勁兵頻年餉絕卒寤甚而殫義殉城志不少  
挫榆林既屠賊搗寧夏寧夏不支總兵官撫民降三邊俱下賊無後  
李自成之赴寧夏也以精騎守河口遣百餘騎按行閩鄉靈寶間榜  
示兵民又三百騎駐陝州浍池俱置吏傳檄河南巡撫南秦所式副總  
兵李成棟屯孟縣河南以西皆盜屬官兵守懷慶之郭家灘沿河列  
礮上命兵部職方主事王真卿聯絡土寨恢復中原承制招李際  
遇際遇迎使者入寨

戊午撫寧侯朱國弼提督漕運鎮守淮揚

庚申太僕寺丞賀王盛閱北河

李自成攻慶陽四日陷之兵備副使段復興先焚其妻子自縊

死知府董琬鄉官太常寺少卿麻禧死之賊執韓王童眷屠慶陽復

興崇禎甲戌進士

十二月辛酉朔故總督丁啟睿倡義兵斬李自成為將於扶溝獲級七

十二

故南陽知縣姚運熙贈河南按察僉事

真人張應京放還

前兵部尚書王業浩王在晉並卒



壬戌張獻忠兵陷建昌  
癸亥侯峒曾為順天府丞

左中允馬世奇右中允楊士聰

韓四維俱為左諭德翰林院

編修徐開禧林增志梁兆陽俱為右中允

乙丑前大學士周延儒有罪賜死延儒字玉繩宜興人萬曆癸丑禮

闈廷對俱第一授翰林修撰進右中允

崇禎 三月歷禮

部右侍郎訐對錢謙益賄舉事稱旨己巳十二月特拜禮部尚書兼

東閣大學士明年七月叙城守功進太子太保文淵閣大學士九月

首輔十一月叙實錄勞進少保戶部尚書武英殿大學士辛未主禮

闈壬申三月叙陵工進少傅吏部尚書建極殿大學士癸酉六月予

告已卯六月存問辛巳二月再召九月入朝十二月考績進 師中

極殿大學士不拜壬午叙山東剿逆功又不拜癸未三月請行邊五

月入朝又予告六月趣之入至是法司擬罪有旨機械欺蔽比匪營

私濫用僉人封疆貽誤勒自盡論贓十二萬許歸殯延儒少無學行

尤耽聲利性極警敏善揣人意指始比溫體仁共執政及再相頗反

溫之所為而操守濫甚徃、假用人為鬻爵地借起廢市德門故踵

進子弟倖捷方時得君不顧外患款局敗委罪陳新甲沒其厚賂牢

籠朝端敗壞國事以致天下左衽痛哉

楊士聰曰 上召雷演祚方拱乾此宜興得罪之始也迨吳昌時

廷鞫後始令催入候旨明子罪因昌時故諸臣言昌時么麼小臣



上曰昌時是么麼彼周延儒也是么麼厥後刑部擬罪舍昌時而專  
言封疆逢迎上意而致之死夫封疆則有之矣豈宜興一人之罪  
且視師不過末年始終封疆者自有其人與宜興何預及至晉出  
又不言封疆而言機械罷內侍撤廠衛皆機械也此內璫所日夜  
文致於上前者至此亦不覺露矣又曰上即位以來命相三  
四十人其中非無賢者求其精神提挈得起惟宜興與烏程二人  
但俱不軌於正耳其初入門更無少異惟宜興近和烏程近刻其  
以自遂一也烏程最久不露瑕隙大意主於逢迎其後轉相摹倣  
不離烏程一派雖精粗不同其揆一也  
談遷曰自直閣以來貴極人臣生赴市曹惟王毅愍夏文愍兩人

耳於時號酷烈旋亦湔雪今我未造綸扉若為真塗韓城宜興相  
繼賜盡四年之內增慘焉軸宜興最得君工於迎合內符大璫外  
調言路謂柱支百禳可也曾未幾何覆公之鍊法至不肯朝廷之  
元氣剝蝕不可復矣夫韓城以忤吳昌時敗宜興以昵吳昌時亦  
敗近之則不遜遠之則怨宣尼致戒於小人誠有以也  
李自成兵攻漢中不克還攻韓城亦不克

王揚基免何騰蛟為右僉都御史巡撫湖廣

高傑在絳州聞賊渡河分道東走一趨吉州一出禹門戊辰至蒲州

丙寅忻城伯趙之龍守備南京

丁卯王繼謨仍兵部右侍郎兼右僉都御史總督宣大山西軍務



張獻忠兵陷撫州南豐

巡撫湖廣右僉都御史林贊免

戊辰總督屯務袁繼咸未赴任令蒞職戴罪

呂大器兵復茶陵醴陵

左良玉遣子夢庚入湖廣

張獻忠出嘉魚遣艾四以前鋒至新隄馬士秀逆戰不利退還

己巳命工部右侍郎周堪賡繪上河工圖

總督倉場戶部尚書白昭清罷

辛未沈自彰為太常寺少卿

壬申進陳演太子太保吏部尚書中極殿大學士

李自成至三原

癸酉故大學士徐光啟加贈太保廕中書舍人

李自成至富平大掠

甲戌以兵部右侍郎張鳳翔蒙恩規避下刑部獄前衛周胤韓文銓

薦之又各坐事謫外

李自成兵私掠蒲州偽將劉馬為之後李自成誅焉

乙亥故都察院左副都御史張瑋贈吏部右侍郎

西域獻千里馬命五城清道試城上不果

丙子故總兵劉源清贈太子少保澤清弟

李自成兵掠韓城



丁丑兵部右侍郎劉令譽協理防河

何騰蛟奏湖南永順保靖之土司黔南銅仁黎平之土司西粵柳全  
之土司皆可用也臣素與其豪長游簡其壯勇可得數萬依湖守險  
土司無遠征之憂百姓無客兵之害平賊將軍左良玉臣所熟知不  
可不藉為犄角徐州副總兵金聲桓肝胆可用其部下劉世昌夏國  
基金成功劉一鴻等皆可與言彼其人原自左營調至今其偕行庶  
可掉運乞加金聲桓援剿總兵銜以示鼓勵從之

艾四追馬士秀於嘉魚士秀又敗走武昌

諭兵部恢復承天荆襄湖廣巡撫何騰蛟會承天鄖陽各撫亟圖之  
又諭兵部令江督呂大器同左良玉平張獻忠黔廣總督李若星沈

猶龍提兵夾擊

戶部郎中沈廷揚加光祿寺少卿專海運

戊寅保定副總兵張天福以江督呂大器標將索馬遂以數百騎叛  
走九江附左良玉

巡撫山西右僉都御史蔡懋德屯平陽以歲莫還太原

李自成勒兵渡河入山西

已卯許都督同知方國安留剿楚寇

副總兵馬進忠進扼蒲州

庚辰寇至河津自船窩東渡副總兵陳尚智走回平陽

辛巳通政司使李兆罷



壬午施邦曜為都察院左副都御史郝晉為刑部右侍郎  
前

李明睿復寇帶召見  
李自成攻平陽知府張璘走太原吏民皆降臨汾知縣劉達擢陝  
西直指使殺西河王等三百餘人於東關外陳尚智擁兵走泥  
源山中四掠  
張獻忠自岳州渡江至營與馬守應合獻忠擄甚蓋李自成西犯去  
焚故獻忠得橫荆岳間

仲於陞世襲翰林院五經博士

寇破稷山河津掠絳州

癸未高傑聞平陽陷自蒲州東走恣掠遂下澤州

劉令譽為兵部左侍郎徐人龍為右侍郎添設提橋改南京太常寺

少卿

禮科都給事中沈胤培乞閔惠王桂王派離之若勅部議安之餘如  
楚王吉王岷王俾撫按商其居止助其供給以慰惇睦從之

李自成馳檄山西各郡縣曰倡義提營首搃將軍為奉命征討事自  
古帝王興廢兆於民心嗟爾明朝大數已終嚴刑重斂民不堪命誕  
我聖主體仁好生義旗一舉海宇歸心渡河南而削平豫楚入關西  
而席捲三秦安官撫民設將防邊大業已定止有晉燕久困湯火不  
忍坐視特遣本首於本月二十日自長安領大兵五十萬分路進征  
為前鋒我主親提兵百萬於後所過絲毫無犯為先牌諭文武官等



刻時度勢獻城納印早圖爵祿如執迷相拒許爾紳民縛獻不惟倍  
賞且保各處生靈如官民共抗兵至城破玉石不分悔之何及  
甲申左良玉兵復臨湘  
寇攻安邑焚西門知縣房投井賊曳出斬之遂圍夏縣掠垣曲  
李自成陷甘州先是鳳翔蘭州開門迎賊因渡河莊浪涼州二衛降  
巡撫甘肅右副都御史莆田林日瑞以副總兵郭天吉四千騎守峽  
口而敗遂圍甘州乘夜雪登城日瑞及總兵馬燝副總兵郭天吉中  
軍哈維新姚世儒等監收同知藍臺鄉官羅俊傑趙官等並死之殺  
居民四萬七千餘人西寧等衛尚堅守不下明年二月詐降殺偽官  
賀錦魯文彬

彭孫貽曰賊之未定三秦也榆林寧夏兵累挫其鋒苟有重臣提  
衡其間諸鎮合從以拒之賊兵既頓而晉師合高傑之兵渡河西  
援勝負未可知也迨邊鎮盡隳賊無返顧之憂則整兵東渡不待  
智者而知之矣蔡懋德率疲卒數千填禹門之險悉甲以拒之猶  
懼其茂濟乃返兵太原令陳尚智羸師以扼平陽旆方旋而泥源  
之師忽潰禹門既渡則三晉無可馮之阻矣誤封疆而悖明詔懋  
德可勝誅乎仗節死綏惜也其晚論者謂懋德忠烈有餘而應變  
非所長君子不能無憾焉  
東陽諸生許都友都故左都御史弘綱從孫也有聲序序任俠喜交  
游知縣桐城姚孫槃會虐借名備亂橫派各戶輸金坐許都萬金都



實中產勉輸數百自詣告竭孫槃大怒摘都所刊社稿名氏謂造逆  
反桎梏之時輸金者盈庭闕然不平有姪生執孫槃於座笞之群  
擁都為主巡按御史左光先聞變調兵行剽官兵所至屠掠東陽蘭  
谿人各保鄉寨拒敵官兵大敗紹興推官陳子龍謂許都不當反遣  
諸生蔣若來晉書諭之

乙酉逮江西湖西道副使岳震巒

左良玉遣副總兵盧光祖惠登相劉洪起以步騎四萬人自河南至

九江入湖廣

丙戌左良玉復長沙湘潭湘陰

丁亥張獻忠前鋒艾四轉戰至三十六灣鋒銳甚馬進忠禦之敗績

又戰敗績於蒲圻

戊子張亮為右僉都御史巡撫安慶廬池太平時各督撫四十有一

開府之濫極矣

党崇雅為戶部左侍郎總督倉場

蔡懋德兵返太原

己丑方震孺為右僉都御史巡撫廣西

貴州葺鎮營參將梁胤林攻桃固山洞擒賊程繼孔覆擾徐

邛間胤林以除夕出不意擒之山寨悉平

許都據浦江游擊蔣提兵乘除夜攻破之賊大潰都走山中



甲申崇禎十七年

正月庚寅朔大風霾占曰風從乾起主暴兵至城破臣民無福

戶部侍郎胡世賞予告

鳳陽守備太監谷國珍報地震

李自成偽稱大順國改永昌元年自成久覬尊號懼張獻忠馬守應

相結為患既入秦通好獻忠獻忠厚幣遜詞自成遂僭號拜宋獻策

為軍師牛金星為丞相更定六政府尚書一侍郎二吏政府尚書宋

企郊戶政府尚書楊建烈禮政府尚書鞏燝兵政府尚書喻上獻刑

政府尚書陸之祺工政府尚書李振世

辛卯總督袁繼威奏五月二十二日拜命是日聞張忠獻破武昌六

二

月六日至婁慶而楚之會城告陷矣恐賊乘虛東下江州人心驚潰

則吳越之勢搖矣臣檄皖撫調兵三千為臣臂指之使臣率陳可立

先到湖口遇賊狂奔乞勅左良玉先事江南掃除獻忠上從之

東江總兵黃蜚議酌用水師

壬辰諭兵部募廢弁及草澤義勇之士

高傑清兵破清化鎮城南渡河駐覃懷

癸巳戶部尚書倪元璐等請以浙省鄉紳團練鄉兵浙西則推徐石

麒錢繼登佐之浙東則推劉宗周姜應甲佐之於保伍中簡練鄉勇

實行古弓考社法從之

兵部尚書張縉彥蒞任



吏部議司務主事陞知府不許

兵部舉廢將于永綬

前兵科都給事中曾應遴奏今之紳富皆衣租食稅而吸百姓之髓者平日操奇贏以愚民而獨擁其利臨事欲貧民出氣力相護無是理也秦蕩之富甲天下賊破西安府庫不下千百萬悉以資賊倘其平日多所取民有事多發犒士未必遂至於此又聞萊陽之破以東門鄉紳張宏德利賊之退盡追鄉民犒膏痛笞而窘迫之一家發難闔邑罹殃虜至今宏德自指其藏得百萬金然後闔門就僇今之紳富亦宜鑒之略借均田之法使富者稍捐以賑貧亦救民撥亂之策也

巡撫登萊曾櫻請實議練鄉兵以避客兵之害實議清野以保民蓋藏之資

甲午故保舉監軍

任棟贈光祿寺卿

復

福王由崧前寇失金寶請補給

乙未諭使部前命內外兼轉吏科都給事中吳麟徵未歷監司不得

遽陞京堂麟徵於內閣無私詔故陳演魏藻德沮之

呂大器奉命入朝袁繼咸仍總督九江

劉承胤為都督僉事總兵官鎮守武岡兼轄黎平清平

雷躍龍改吏部右侍郎張維機為禮部右侍郎各教習庶吉士



議調遼東總兵馬科南征工科給事中高翔漢言建出塞未數月  
今連撫黎玉田永撫李希沆揭稱復欲入寇寧遠逼近不可示以單  
弱而調兵南征豈稱勝筭將為三軍司命唐通馬科孔希貴錚、有  
聲鎮臣盧九德怯甚已經議易而馬科仍調南行三軍誰為統率乎  
許都伏誅都得陳子龍書率同事十三人詣杭州投獄巡按御史左  
光先即斬之盡隱妣孫槩之失奏復秩  
張有譽為南京戶部右侍郎兼右僉都御史總督糧儲  
儒士陳子階特授南京欽天監博士  
趣總督余應桂巡撫李化熙抵鎮  
貢士上海何剛授兵部職方司主事練東陽義烏兵剛上收人用將

廿九

行兵三策其收人曰忠義智勇之士在浙則東陽義烏昔時名將初  
兵多出其地東陽生員許都天性忠孝素裕韜鈴乞用之以勸徽婺  
二郡之奇才臣願以布衣奔走聯絡悉遵戚繼光法申詳約束開導  
忠義歲餘可使赴湯火蹈臣見進士姚奇胤桐城生員周奇陝西生  
員劉湘客山西貢士韓霖皆憂時有心乞下詔採天下豪傑則忠義  
智勇連袂而起矣有旨許都姚奇胤下該部速議不知許都以叛誅  
也  
丙申都督同知方國安為平蠻將軍總兵官鎮守湖廣  
前兵科都給事中曾應遴薦副總兵鄭鴻逵緩急可用  
丁酉許方孔焯戴罪整理河北屯田事務



戎戎諭京師講鄉約朔望宣聖祖六諭仍立善惡二簿咨訪  
高傑南下江北大震總督漕運路振飛命副總兵金聲桓拒徐州周  
仕鳳守泗州周爾敬守清口  
宣府總兵唐鈺貪淫被劾免

都察院左副都御史兼東閣大學士方岳貢請覈赦前舊賦或官吏  
侵渙命限三閱月指奏

召撫寧侯朱國弼忻城伯趙之龍對中左門

己亥故禮部右侍郎吳士元故

楊光旦故南京都察院

右都御史張廷登各予祭葬

故

苑景泰贈太僕寺少卿故山東海道邢國璽贈光祿寺

卿故渭南知縣陞兵部職方主事楊暄故

朱一統並贈陝

西按察司僉事各廕子入國子監

王之仁為都督

總兵官鎮守浙江周仕鳳為署都督僉事總兵

官鎮守廣東

刑科給事中郭克言盜入關中憂不止秦也會城之安危不曉則督  
臣之趨進無方 官之聚散不知則三邊之征調難及賊勢之趨向  
不測則河東之防禦亦徒勞必偵探明白新督臣疾往如賊羽充斥  
勢難渡河宜從永寧渡綏德直趨固原亦以上涿御下風聞賊入時  
官兵劫地方民人駭散河東防賊當不在河東而在河西今賊入關  
一月地方尚爾蒙、未有不知彼而能取勝者也



定漕運官六員各領千艘勒限竣役  
庚子王庭梅為順天府尹  
上聞遼民任氏奏鼓聯義勇命通政司工之  
呂大器言湖廣官無一人舊巡撫承天王楊基戴罪於江請改撫湖  
廣仍兼承天  
巡按山西御史汪宗友檄副總兵熊通同河東道郝綱以千二百人  
赴河上宗友奏曰晉河二千里平陽居其半撫臣蔡懋德不待春融  
冰泮十八日自平陽反省二十日賊渡矣隨行馬步千餘宜兼程回  
平陽招陳尚智叛兵檄各路防剿乃不發一兵二十一日至省臣力  
言宜提一旅而前張疑聲冀桑榆之效無如不聽何賊日選偽官臣

月餘郡皆失是誰之過與

李自成偽牒兵部稱大順永昌元年約戰言三月十日至兵部執牒  
者則京師人自涿州還值逆旅客暴疾予千金代投以為詐斬之  
上憂寇臨朝而歎卿等豈無能分憂哉大學士李建泰進曰臣晉人  
頗知寇中事臣願募本地餉百萬治兵剿寇毋使東渡又曰進士石  
蔭願單騎走陝北連甘肅寧夏之兵外連羗部召募忠勇勸輸義餉  
剿寇立功否亦內守西河扼吭延安使賊不得東渡上悅曰卿若  
行朕當做右推轂上欲用石蔭建泰曰俟臣西行酌而用之  
辛丑總督漕運路振飛薦淮安同知范鳴珂郡倅二十年清恬不爽  
請補淮徐道僉事以代何騰蛟



甲辰召

何楷入朝

提督操江誠意伯劉孔昭薦前巡撫貴州右都御史田仰堪任節

錢

釋姜埰能開元獄

李自成火宴功臣即席賜列侯銀一萬金五千珠一斗列伯以是為

差或五升三升尋自成東行以秦王存樞永壽王誼汎韓王亶春慶

王倬雍從四月殺諸王於山西

乙巳左夢庚先發九江張獻忠自岳陽渡江設偽官於江北屯師江

北遂棄長沙作浮橋於三江口一軍過荊州棄其舟竟步騎數十萬

上夔州

王承胤為鎮朔將軍都督

總兵官鎮守宣府

丙午諭兵部曰山東土寇出沒命撫按剿盜通餉又曰人心不固聞

警倡逆亟行賞罰用示勸懲又曰畿南震隣紫荊倒馬龍門固關宜

亟焚備又曰秦督已至河即率高傑等相度往援宣督星馳防河

工科給事中彭瑄言逆賊犯楚實由人心惑於三年免租一民不殺

之偽示耳又見撫臣李乾德懸示免征益復踴躍倘皇上大下蠲

詔通行曉諭更當何如近傳十六十七年寬赦何如寬之十八年使

賊滅後猶有餘力并奇荒赤地通行的免使老穉捧檄泣下非目前

第一義乎武昌破時沿江積屍千里郡縣收復原任官戴罪不敢任

事必待選補之臣功名與性命較則輕決不赴任罪以規避而止何



益於地方之緩急請查陷城各官除門迎先逃外調補空地以聯絡  
人心似為切要  
寇入洪洞知縣乾州吳東璧降拷掠宦室助餉前吏科都給事中申  
嘉言脅二萬金猶夾死  
丁未沔陽監紀知州章曠以鄉勇三千赴沔陽值賊景陵敗績失亡  
千人  
左良玉上武昌攻江督叛將張國柱張天福  
戊申吏部奏秦寇窺渡三晉披靡賊騎未到而城池已空偽檄方傳  
而人心胥亂因議六事復保督察厚防緝煽惑急練戰講聯  
絡其緝煽惑欲委之秦中科道官密察秦人在京者恐為奸伏以應

寇也

熊通郝綱次靈石扼守郭家灘請濟師

總兵高傑報寇渡河有旨責撫按疎防高傑既稱兵精當破賊何待  
大兵西集也又命山西總兵周遇吉扼河助高傑

劉肇基為南京左軍都督府同知提督大教場

巡按蘓松常鎮御史周一敬恭貢士金壇虞植逆親害民  
總督鳳陽馬士英奏太湖縣疎防失守

已酉實授郭中杰副總兵

侍郎金之俊奏收拾人心聯絡鄉勇俱從鄉紳起江南士紳素稱好  
義命撫按責成



余應桂逗遛兵噪奪總督聽勘

李自成至聞喜搜捕巨室

庚戌戶部題督輔餉司戶部主事介松年改戶科給事中

南京戶科給事中羅萬象極言南糧折乾之弊

李化熙為兵部右侍郎兼右僉都御史總督陝西三邊軍務

起郭景昌為右僉都御史提督鴈門等關兼巡撫山西

諭戶部邊餉告亟外解不前餉臣既撤令鹽臣黃家瑞督催解京

壬子葬皇貴妃田氏

召忻城伯趙之龍巡按陝西御史金毓峒於中左門

寇陷趙城副總兵陳尚智降於李自成導之破趙城寇所至多開門

出迎結寨反拒官兵

李建泰薦布衣羅天錦下部錄用

諭工部以開封大水下按察司官會撫按撈起遺貨

提督操江誠意伯劉孔昭奏安慶廬州當添防兵蕪湖尤要嚴飭

癸丑進陳演少保吏部尚書建極殿大學士詹中書舍人演三年考

績

命總督鳳陽馮士英監勇衛營太監盧九德協剿張獻忠

故李輔明贈左都督謚

兵部尚書張縉彥言自舊撫熊奮渭潦倒之後海上僅足一旅民壯

則多人奴占役鄉勇則虛應故事將領則總督名懸叅將以下皆統



袴儲備則絳朽藥銷餉供則奇荒大疫道殣相望豈真一方之利害而已  
真定叅將李茂明報寇陷三晉高傑縱掠河東  
夜星入月中宋史云星入月中國破君亡  
甲寅郝綱熊通走回太原

乙卯命駙馬都尉萬燁告太廟行遣將禮勅吏部右侍郎兼東閣  
大學士李建泰曰代朕親征以尚方劍從事一切調度賞罰俱不中  
制上臨軒授尚方劍幸正陽門樓宴餞之命文武大臣侍坐樂作  
上手賜卮酒曰如朕親行建泰頓首趨行上目送之至泣下是日  
大風霾占曰不利行師建泰御肩輿不數武杆折識者咎之進士程

源說監軍凌駟曰此行也兼程抵太原收拾三晉猶可濟也若三晉  
失守無可為矣進士凌駟授兵部職方主事監軍赦故李  
政脩罪從行營効用副總兵郭中杰充中軍西洋人湯若望隨脩火

攻水利

諭兵部淮揚重地令漕運鹽法二臣增兵

南京守備太監韓贊周奏南京地震

回回貢馬玉玉大者重三百五十斤次五十斤

兵部尚書張縉彥駁監軍渡河之報上亦聞寇未渡河責兵部輕  
信

談遷曰秦隋惡聞盜賊而止

先帝嚴明不幸晚亦類之且平陽



陷父豈撫臣蔡懋德不以聞乎如以聞又何能諱也鼓鐘於室聲聞於外覆敗同軌可為殷鑒

徐標為右僉都御史巡撫保定提督紫荆等關

工部尚書范景文禮部左侍郎丘瑜並兼東閣大學士直文淵閣

丙辰督師大學士李建泰出都道聞晉警甚家存亡未卜因徐行日

三十里

談遷曰輔臣督師先帝時屢矣高陽矢力危疆克舉其任武陵

沾、自喜綆短汲深興化逡巡不力旋聞賜玦俱於高陽媿之曲

沃自請督師志本殉國方是時逆黨渡河三晉半陷倘即卷甲疾

馳首控晉陽傳檄西塞獎率吏民慨然同陶荊州之灑泣張睢陽

之笑廟甘萬死以赴之背城借一亦云幸也即其不效亦有辭於

天下萬世臣何負焉而曲沃食容、之福已久冀倖意外利則為

高陽非利當不失為興化又何急之有日者余應桂總督陝西之

命時寧夏甘肅榆林亡恙能如王剛中一日夜馳三百里號召豪

傑鼓厲義勇寇方顧其後未即東渡也國事大壞俱用非其人肉

食者謀之不敗不止矣噫

丁巳諭兵部曰逆猷蹂躪江楚平蕩無期目今平賊將軍大兵有無

馳剿江督見駐何處鳳督是否發兵會殲黔粵各督曾否遵旨提旅

扼援科臣左懋第察核既竣着即察催各路兵馬併楚皖江沅各撫

犄角進剿四面圍擊勒限三月內削平奏功不得逗遛曠日坐失事



會事平破格封廕如有觀望不進遷延逾限參來重處  
高傑屯覃懷有兵三萬馬騾九千遣使壽州通總督鳳陽馬士英士  
英請安其衆於徐州聽節制  
李建泰至涿州兵逃三千餘人  
大學士陳演請釋累臣命刑部十日內具獄許贖  
太僕寺丞賀王盛上所勘膠河圖  
逮巡撫徧沅右僉都御史陳睿謨  
張邦謨夏登仕仍副總兵毋濫加都督同知  
諭戶部開採事例尚書倪元璐言開採非便事例准首可暫行從之  
南京吏部主事陳子龍改兵科給事中

前兵部尚書張國維以蒙蔽命撫按逮至都察院左都御史李邦華  
戶部尚書倪元璐俱言國維可用命仍原銜督理浙直輸餉練兵國  
維奏輸納事宜

戊午吏科給事中李清言監司止宜實陞上從之諭吏部久任

蠲南直崇禎十二年以上贖緩

馬士英以副總兵駐朝樞守徐州令中軍副總兵楊振宗賚金幣賚  
高傑安其家口於徐州閶廂

李建泰發真定行至廣宗紳衿城守不納攻三日破之殺鄉紳王佐  
管知縣弘張基是日即移兵出城

己未李明睿為右庶子衛胤文羅大任為左諭德



左良玉至武昌屯金沙洲

二月唐申朔工早朝忽得偽封啟之其詞甚悖末云限三月望日至順天會同館暫繳一時相顧失色朝罷遂不復問

進張承胤太子太師左都督劉有實仍都督僉書總兵官鎮守紫荆等關轄四路

馬進忠復長沙初張獻忠聞楚師日集以舟重水涸盡棄之自荊州入夔門方國晏馬進忠分道並進焚其舟遂復長沙諸軍連營屯長沙岳州左良玉以五營追賊於沙陽距荊州七十里

河北屯撫方孔炤奏屯墾巡按應天御史鄭崑貞言興屯業有實效上諭興屯求為足國裕民若未經開墾輒議三科小民能無畏阻

逮巡撫登萊右僉都御史曾櫻

李自成陷蒲州蒲州諸縣皆降命李安守蒲州追傑於化鎮入鎮城

設偽官濟源諸縣人竄盡河北大震懷慶城盡閉

辛酉前督師兵部右侍郎丁啟睿薦前知縣夏萬亨能勸農請

陞副使不許

李自成陷汾州府知府侯君招死之汾陽知縣劉必達袖罵閻被

義勇范奇芳手刺偽都尉拔劍自刎曰吾不死于賊之手自成以奇

芳首懸于青龍驛士多吊之河曲縣奸胥奪印獻於自成靜樂縣人

迎賊

懷慶府不守福王出奔與太妃相失遂至衛輝依潞王御史霍達至



衛輝追高傑不值  
壬戌兵科給事中韓如愈言晉寇訛傳噫諸臣欺蒙如此

都督僉事劉有實專轄三閩

癸亥諭言官論事須明白直陳毋隱語非告君體

逮江寧知縣楊文聰文聰素婪虐去春王允成兵東下南京兵部尚書熊明遇委文聰同都督孫必進往禦輒自署南京兵部職方主事縱卒暴掠勒蕪湖知縣夏繼虞行屬禮繼虞不受南京都察院右都御史張慎言劾之至是得命未發而止

前科給事中姜埰成邊

科給事中方士亮故御史蔣拱辰故兵

部職方郎中尹民興俱杖贖時刑部尚書張忻議贖罪曰誤殺意及

於甲誤及於乙殺者可恕死者易暝富則千金次五百金貧亦百金

曰闖殺視誤殺有間富則千五百金次八百金貧亦三百金曰同謀

共毆致死者富必三千金次千金貧亦三百金

工部主事李逢申言勸取不若糾貪赦罪輸餉上從之命九卿科

道糾贓甚者一二人如議

王正志王鰲永為戶部左右侍郎鰲永總理錢鈔

甲子山西糧儲道

程

奏鹽課虧七十餘萬

命益王由本歸國先避邵武

故兵部右侍郎劉之綸謚

李自成至太原自平陽陷諸將咸遁巡撫山西蔡懋德以驍將牛勇



朱孔訓出戰孔訓傷於礮牛勇陣沒一軍皆殲城中奪氣  
乙丑左良玉以副總兵盧光祖等分道上隨州棗陽承天德安賊魁  
馮守應自荊州移襄陽官兵統領陳有業攻雲夢偽國州牧高翠堅  
守不克  
寇圍太原傳檄遠近略曰公侯皆食肉執袴而倚為腹心宦官悉斲  
糠大豚而借其耳目獄囚纍、士無報禮之心征歛重、民有借亡  
之恨云云  
巡撫山西蔡懋德知力不支書遺表令監紀賈士璋間道奏京師中  
軍盛時泰見之退殺妻子誓必死  
陝西道御史王章巡視京營

諭戶部曰邊餉甚亟外解不至皆由有司急贖而緩錢糧不嚴賞  
罰何以勸懲今內青部科外青巡按痛禁耗索完額則陞京堂否者  
除名

中書舍人張同故言楚豫紳衿多從賊宜察諸生忠逆為教官功罪  
上然之

談遷曰忠逆本於士心即教官何能為宋士習壞於王介父新說  
今士習之壞自晉江李贄始相矜以權術目坑焚為救時訛瀟洛  
為積腐宜楊雄馮道之深踵接於世也

兵科給事中時敏例轉金華知府敏奏辨命還原官  
常澄嗣襄王



丙寅前總督陝西三邊軍務余應桂報全晉瓦解上切責之曰爾奉命督秦何遠奔沁澤前跡兵僅二百今言近千其以實覈

丁卯大風霾按邯鄲縣志云大風逆變闇室照之赤如血召廷臣於中極殿并及陳演戶兵部科

太原陷賊夜登城巡撫山西右僉都御史崑山蔡懋德左布政使永寧趙建極兵備副使鄭州毛文炳按察僉事萊州畢拱辰等死之執

晉王求柱

郝晉孟兆祥為刑部左右侍郎張弘道為光祿寺少卿

戊辰勅李建泰曰朕仰承天命繼祖鴻圖自戊辰至今甲申十有七年未能脩德尊賢化行海宇致兵荒連歲民罹兵戈深毒直省朝廷

不得已用兵剿除今卿代朕親征鼓淬忠勇表揚節義獎厲廉能選

拔雄杰其驕怯逗玩之將貪酷倡逆之吏妖言惑衆之人逆誤軍情

之輩當以尚方劍從事一切調度賞罰俱不中制卿宜臨事而懼好

謀而成剿則殲渠宥脅撫則解散投戈早蕩妖氛旅師奏凱封侯晉

爵勒銘鼎鐘頌將代朕至意徧行示諭始建泰言傾家皆享士及聞家破失措頓畿內不前

命總兵劉澤清自臨清移彰德

故河南睢陳道僉事隴西關永傑贈光祿寺卿故陳州知州成安侯

君擢贈河南布政司右叅議永傑崇禎辛未進士居權天啟辛酉貢士壬午七月俱陷陳州

故張質贈河南按察司僉事故王壽爵贈宛平

知縣故河南知府臨汾元思檜贈太僕寺卿故河間知縣文水陳三



接故知縣常情各贈山東按察司僉事故李貞佐贈

河南按察司僉事並詹子入國子監

已巳召閣臣時蔣德璟疾不至

諭吏部平陽副使李士焜等七人先逝後還已經革秩着戴罪圖切

唐午巡撫保定右僉都御史徐標為兵部右侍郎北軍務仍巡撫保定

諭戶工右部侍郎王鰲永鑄當二當五錢

刑部郎中鄭爾說轉杭州知府遂叅吏部文選主事左懋泰為尚書李過知駁奏

建薄寧遠平虜將軍閔遼登津水師總兵官黃蜚大潰

張應元進右都督命進士俱注官赴任

巡按河南御史蘓京被叛將馬奎蘓見樂陳德縛於寧郭驛獻寇求

辛未召戶兵部科及總兵吳襄於中左門

李自成至黎城他將臨晉

莊朝樑守河上縱高傑渡河至徐州士民驚擾傑旋赴壽州謁馬士

英諭戶部郡縣民壯原以捍衛地方乃祇供勾攝封守何裨嚴責有司

編入鄉兵實行選練

諭刑部吳昌時論死馮源等遣戍財產并罪輔周延儒籍沒完餉又

曰周延儒見賄忘法本當全沒量追十二萬吳昌時五萬

停鈔法前市浙直桑穰等料仍輸京師

總督鳳陽兵部右侍郎兼右僉都御史馬士英歸援剿總兵高傑於



徐州同監軍龔彝

壬申 上憂寇罪已詔曰朕嗣守洪緒十有七年深念上帝陟降之威祖宗付託之重宵旦兢惕固敢怠荒乃者災害頻仍胡寇並急生民荼毒靡有寧居惟彼狡倖固曰犬羊非我族類若此沐寇則分屬君民誼無赤子忘累世之養養肆廿載之克殘救之益驕撫之益叛反以殺人為仁掠財為義至有受其煽惑頓忘仇敵深可痛傷朕為民之父母不得而郊翼之民為朕子不得而襁褓之坐令秦豫丘墟江楚腥穢貽羞宗社致疫黔黎罪非朕躬誰任其責所以使民鑿鑿鎬蹈水火矧量以整骸積成丘皆朕之過也使民輸芻輓粟居送行賚加賦多無藝之征預徵有稱貸之苦又朕之過也使民室如磬懸

田卒汚萊望烟火而無門號冷風而絕命又朕之過也使民日月告凶旱潦洊至師旅所處疫癘為殃上干天地之和下叢室家之怨又朕之過也至於任大臣而不法用小臣而不廉言官首鼠而議不清武將驕懦而功不舉皆朕撫御失宜誠感未孚中夜以思跼蹐無地已實不德人則何尤用告爾天下官吏軍民人等朕今痛加創艾深省夙愆匪涉虛文恪循實事要在惜人才以培元氣守舊制以息紛囂行不忍之政以收人心蠲額外之科以養民力念用兵征餉原非得已各省直撫按官急飭所屬有司多方勸諭毋失撫字倘有擅加耗羨朦混私徵及溢罰濫刑致民不堪命立行正罪其丞亡來歸除蠲賦逋加意安插賑恤毋致失所至於罪廢諸臣有公忠正直廉潔



幹才尚堪用者不拘文武着吏兵二部確核推用以彰使過草澤豪  
杰之士有恢復一郡一邑便分官世襲功等開疆即陷沒脅從之徒  
能舍逆反正率衆來歸准赦罪立功能擒斬闖猷仍予通侯之賞於  
戲忠君愛國人有同心雪耻除克誰無公憤尚懷 祖宗之厚澤助  
成底定之大功思克厥愆歷告朕意

談遷曰輪臺之悔奉天之詔漢唐二主感動海內克光大業而  
先帝末歲倦下翻然下尺一昭如日月當其時民莫苦於橫征率  
空言無指實朝廷好負人亟則引咎緩則反汗愚夫習而知之故  
耳目頑錮如初也倘即減今歲田租之半躬閱內府盡出其所有  
金幣珠玉等尺寸毋少靳明示吏民以充祿餉誅一二掊克之吏

銳意更始而吏民不為感動者未之有也

潘世子

年十六被執偽將見其幼所佩大金錢文為大順永昌

李自成陷潞安試諸生分騎趨懷慶彰德傳檄曰上帝監觀實惟求  
莫下民歸往祇切來蘓命既靡常情尤可見粵惟往代爰知得失之  
由鑑往識今每知治忽之故茲爾明朝久席泰寧浸弛綱紀君非甚  
賧孤立而鳩龜恒多臣盡行私比周而公忠絕少賂通公府朝端之  
威福日移利炫宗紳閭左之脂膏殆盡肆昊天幸窮乎仁愛致兆民  
爰若於稷災朕起布衣目擊悴憔之形身切痼瘵之痛念茲普天率  
土咸罹困窮詎意易水燕山未甦湯火躬於恒冀綏靖黔黎猶慮爾  
君若臣未達帝心因喻朕意是以暫言正告爾能體天念祖度德審



幾朕嘉惠前人不吝異數如祀如宋饗祀永延用彰爾之孝有室有  
家民人胥慶用彰爾之仁凡茲百工勉保乃辟綿裔孫之後祿膺嘉  
客之休聲克殫厥獻匪詛靡忒惟合詔布允布腹心君其念哉固怨  
悃於宗工勿陷危於臣庶臣其慎哉尚效忠於君父廣貽穀於身家  
甲戌寇前鋒至大安驛兵部尚書張縉彥請令督輔李建泰綢繆布  
置臨清德通天津昌平密雲六鎮俱聽調遣時建泰在河間遭延不  
進  
起故 道御史成勇戶部主事葉廷秀  
偽吏分遣於山西河南北直舊令多逃輒為土人拘留苦之或面受  
代又派諛曰吃汝娘着汝娘吃着不盡有闖王不當差不納糧遠近

聞之人人延頸思亂矣

魯世子以海嗣魯王

乙亥諭部院曰寇氛入晉畿輔戒嚴固圉安民全在察吏該撫按屬  
官嚴加甄別必清謹循良素為民戴方許留任責令募練鄉勇妥備  
城守如貪殘闖兇令解任另行推補

議京師城守

宋權為右僉都御史巡撫密雲

李自成至忻州官民迎降遂攻代州五臺知縣文運溥迎降總兵周  
遇吉守代州出奇奮擊累旬日殺賊萬餘自成合諸路兵進攻遇吉  
兵少食盡退守寧武闖誓師曰盈、黃河水諸將望風奔潰既不能



守又不能戰國家何賴此武臣為與青士崔夢潮率精卒數百人且

守且戰

寇陷懷慶命勸貸文武諸臣限五日戶部上文武納銀貲封事例

馬世奇為左庶子徐開禧衛胤文為左右諭德林增志為右中允開

禧尋憂去

金燦進南京鴻臚寺少卿

故刑部右侍郎朱大啟贈尚書故

倪應春贈南京工部右

侍郎故兗州知府鄧蕃錫贈太僕寺卿故兗東兵備王維新贈光祿

寺卿故

高維益故

王來故

劉禮各贈

河南山東

按察僉事故

范玄超贈工部營繕司主事

故

李時正贈良鄉主簿並廢子入國子監故閏

閏

三選贈國子學錄

丙子戶科給事中介松年上言士節不振廉耻風微倡述迎降出自

矜紳深可痛憤亟宜崇獎節烈以收拾人心 上是之

戶部右侍郎王鰲永屢疏請纓 上以始鼓鑄未允

吏科給事中馮嘉植言 皇上亦知孫傳庭債事之因乎守閩原自

有餘大言一鼓蕩平僥倖為之是以進退失據今不戒覆轍而空拳

徒膺萬一太原與淮揚俱震則為禍愈激非知彼知己之笑也臺臣

陳丹衷借兵土司之說尤宜商榷以數世養之兵尚不能必其用



命而向蠻夷責大義亦難矣況不能暴糧影從則搜括不加倍子百姓見兵過搃手閉戶狼兵一來保無驚疑乎兩粵之間又增多事矣丁丑寇抵固關分趨真定保定戍軍吏部題堪任督撫諸臣沈迅魏公韓孫肇興朱家仕萬元吉馮鳴騶楊毓楫何楷聶明偕周光夏許譽卿汪心淵毛九華夏允彝王道純詹爾選黃宗昌鄭之尹王守履李長春毛羽健李建泰兵過東光不敢士民閉城拒守建泰怒留攻三日破之已卯太康伯張國紀助餉萬金命進爵為侯  
庚辰大寒  
上始聞山西全陷命跡訪諸王

以下脫崇禎十七年

三月 五 八月

史本保全







聖